

Romanos

Iraiti Waiyexe Tyotyta Halitinai Anere

1 ¹Naty Paulo naxairatya exe babera. Natyo atyo Jesus Cristo wakanehare exahe iniraene kakoare. Enore atyo aoka natyo hawakanehare maheta hoka axikatya natyo noxakai Iraiti Waiyexe maheta halitinai hiye.

²Toahiya xowaka exe Iraiti Waiyexe kakaisaka iraiti kakaisaseharenae hiyeta. “Exe Iraiti Waiyexe halitinae anere”, nexa Enore hoka Iraiti kakaisaseharenae xairatene babera waiyexe nanekoa. ³Enore irae Haisani Wiyekohase Jesus Cristo tahi, xekohaseti Davi hotyalihare nerekatu exaokaka. Haliti waiyekoarehare akereta tyaona Davi ene nawenakala nali. ⁴Enawenane waiyexe atyo kaotyaka kasehetehenere haiyaterere kakoa xowaka hoka hatyo hiyeta Enore Ityani kaxaokaka.

⁵Hiyeta atyo Enore iraiti kakoare moka natyo Cristo hatene nahaka maheta. Tyotyta haliti hotyaliharenai hiye noxakaini hoka tyakekoha exahe tyaonaha exema maheta.

⁶Hoka hatyonai konitare atyo xiso Roma nali tyaoniterenai. Xisonai tehitiya atyo Enore aoka Jesus Cristo anerenai xisaona maheta. ⁷Hiyeta exakere naxairatya xiso Roma yerenai ana, xiso Enore awaiyetiterenai exahe hahotyaliharenai aohenerenai ana.

Maika wenati waiyexe, Wexe Enore mehexaikoharene exahe Wiyekohase Jesus Cristo xoaha nalitare tyaona xikakoa.

Paulo Niraexala

⁸Exe hotohare niraе naokowita: Jesus Cristo hiyeta nihalahareta Enore kakoa xihiyeta. Hiyaiya, hakakoarehena xityakekone tahi semahitaha.

⁹Xasemehena, Enore ana nahakita nihalahalini kakoa, Waiyexe Iraiti noxakaita Ityani tahi akiti. Natyo atyo niraexatya xomana tyotyaki ferakene. Hatyo akiti waiyehalakita Enore ana. ¹⁰Niraexaita xomana. Naxita Enore hoka exaokalitaiya hoka notyoa nowaiyeheta xiso. ¹¹Kasani nowaiyeheta xiso hoka naotyakisa naokowita xiso waiyexe kakoa hoka xikinatere xisaona maheta.

¹²Exakere atyo niraе naokowita, kasani atyo wityotyta, natyo, xiso xoaha atyo

haxowakita wakahinaetyakakoa naokita hoka xikinatere xisaona notyakekoni hiyeta, exahe natyo tehitiya hoka nokinatere notyaona xityakekone hiyeta.

¹³Nohinaeharenae, kasani exeharenae waiyekehalaka xomana naokita. Kahaliki xakore notyona nowaiyeheta xiso naokowita hoka xoalinihare tyaonita nomani hoka maisa aliyakere notyoare. Kasani nohateni tehitiya kekoare xinekoni naokita, haiyaharenai majudeuneharenae koni nohateni kekoaretere akereta. ¹⁴Nikarexe terota atyo nohateni: owiteneta tyaoniterenae, exahe seko tyaoniterenae, exahe koxaka kaxaotyakisakitereharenae, exahe mawaiyoreharenae harenai atyoite naotyakihena. ¹⁵Hatyo hiyeta kalikini atyo nomimiye notyaonita Iraitu Waiyexe noxakaini kakoa xiso Roma tyaoniterenae hiye.

Wityakekone Hiyeta Atyo Enore Haliti Waiyexe Aokita Wiso
(*Romanos 3.21-26; 4.5; 5.1; 8.1; Galat. 3.1-7*)

¹⁶Maisa atyo nohaiharexe Iraitu Waiyexe noxakaini kakoa. Hiyaiya, hatyo atyo Enore niyaterere iyeheta maheta tyotya tyakekohenerenena. Judeunai hotohare ite, hatyaosetaite majudeuneharenai. ¹⁷Hiyaiya, Iraitu Waiyexe atyo hotikijita womana hoka Enore atyo haliti waiyexe aokita wiso wityakekone hiyeta, hetatita, imiyane kijiya, Iraitu Waiyexe iraterere akereta: “Xala xamani atyoite Enore haliti waiyexe aoka ityakekone hiyeta hoka tyaota mene atyoite”, nitere akereta.

Halitinai Nómane Iniyalahare Tahi

¹⁸Hiyaiya, Enore xeharene atyo enokoata tyoita tyotya iniyalahare nomaseharenae ana. Hatyo iniyalahare háomaneha hiyeta atyo talatitaha Iraitu Waiyexe, kasani haiyanai maisa semahene aokareha hoka. ¹⁹Enore atyo iniyalahare mokahitene. Hiyaiya, halitinai ana waiyekehalakita etahi akiti. Enore ta atyo hatyoharenai hotikisa enomanaha. ²⁰Hetati Enore waikohe tyomehenere xowakiyita, enawenane mawaiyakahare, niyaterere matyotenehare, enawaiyore harenai waiyekehalaka enómanenai hiyeta. Halitinai tyotya hatyoharenai waiyaha hoka hatyo hiyetaiya maisa xoare maheta teraharetyoahitaha. ²¹Enore xakore waiyahitaha hoka maisa aiminisarahene, exahe hoka maisa ihalaharexeha ekakoa. Hatyo hiyeta exahekolaha maisa waiyexe, motya makaliroti exahekolaha tyaonita. ²²Waiyore xakore aokowitaha hoka hatyaharexeha atyo. ²³Enore makamanehare xema tyaonareha mahetare ene hoka enomakahare xema tyaonahitaha. Haliti xaimenekotyaka, kotehala, kirakahare, owi harenae xaimenekotyaka xema tyaonahitaha. Hatyoharenae atyo haenorexa aokahitaha.

²⁴Nikare atyo hatyo halitinai tyaonita hoka Enore atyo halakisahene hoka haxahekolaha iniyalahare ximita tyaonaha hoka xoalini hare iniyalahare kahaiharetyakere tyomaha hahinaeharenai kakoa maheta. ²⁵Enore niraene aliterexe atyo halakisaha hoka maoseratyati xema tyaonahitaha. Enore tyomehenereharenae xema atyo tyaonahitaha,

maisa enomasehare xema tyaonareha. Enore nómanenai hiyeta ene atyo kaihaharetyakehena ekakoa maheta ene.

Wenati Iniyalahare

(1 Corint. 3.3-4; 10.6-10; 2 Corint. 12.20-21; 1 Tim. 1.9-10)

²⁶Hatyoharenae tyomahitereharenae hiyeta Enore halakisahene hoka kahaiharetyakere tyomahitaha, exahe ohironae kakoita hoka haohironehatyanae kakoia iniyalahare tyomita. Maisa ene hatyoharenae kaomaka maheta ene xini. ²⁷Exahe enanae tehitiya hoka halakisaha ohironai hoka xane hatya haenanehatya kakoia iniyalahare, kahaiharetyakere tyomahitaha, kalore maiyasekakohitaha hoka nikare tyaonahitaha. Nikare tyaonahitaha hoka hatyotaha atyo iniyalahare axomokanikisoahitaha hoka iniyalahare kaxomokakahitaha hatyoharenai hiyeta.

²⁸Maiha Enore tahi akiti aliterexe semaha aokowiyeha hoka iniyalahare xahekotyati isa enomanaha hoka tyomaha maheta xalini hare hamaomanenehareha niyahare maheta. ²⁹Maisa waiye ahekotyareha, maisa waiyexeha. Xiyehaliti maiyasahitaha. Okoareha, aisahitataha, mokotyahitataha, maoseratyahitataha, xekahatiharetaha harenai. ³⁰Iraeharetyahitataha, exahe iniyalahare irataha hahinaeharenai tahi. Kirawanahitaha Enore exahe kinatere aokowitaha. Ahinityareha exahe aokowiharetyoareha. Kahare iniyalahare aomatikisaha hoka tyomahitaha. Maisa hanexenai niraene tyakekoreha.

³¹Ohiroareha, enatyaloha tyaonahitaha, maisa hairaene akereta tyaonareha, maisa kaisereha, exahe maisa haiyanai airakoaneharyareha. ³²Waiyekehalakita atyo Enore xaotyakiraho enomanaha. Hiyaiya, xala xamaniya atyo nikare tyaonita hoka waiye xaisaka atyo, nitere. Hatyoharenae xakore waiyekehalakita enomanaha hoka hekota hatyoharenai tyomahitaha hoka haiyanae hatyo tyomahitere akereta tyomiterenai atyo awaiyetyahitaha.

Enore Xaxalira Tahi

2 ¹Nohinaehare, xoana hoka haiyaharenai hiraeharetita? Exahe atyo xala xamani hiso hoka maisaiya atyo hateraharetyoita. Hiyaiya, haiyanai xakore atyo hiraeharetita enawenaneha hiyeta hoka hatyo tyaonahitere akereta atyo hisaonita hoka hisota atyo iniyalahare maniya haxomokanikijoita. ²Exe atyo waiyekehalakita womana: Enore atyo maisa iniyalahare nomasehare xini hoka ehkoreta atyo hatyoharenai tahi iraeta. ³Hoka hiso nohinaehare atyo hisomita iniyalahare, haiyanai tahi hiraetere akereta. Hoka xoana hiyahekola hiyetaite hoka motyalaite Enore axalihenere xowaka maisa iniyalahare mokita hiso haokita? ⁴Xoana himatyakekoneheta kore Enore nawaiyexehare, maxeharenehare, exahe emamaxahareneharene? Waiyekehalakita atyo enawaiyexehare homana, kasani hahalakiheta iniyalahare hománenai aokita. ⁵Hoka hiso atyo maisa waiye hahekotyare, exahe maisa hityakekohatiye. Hatyo hiyeta aeroretyoitata atyo iniyalahare hiyomokaka Enore haxeharene, exahe haxahekolanai waiyexenai hotikihenere ferakene niyahare.

⁶Hiyaiya, tyotyia haliti ana, hatya xakini ana atyoite isehetehena tyomehenere akereta. ⁷Hoka isaite wenati matyotenehare waiyexe tyomitereharenai ana, waiyexe tawitereharenai ana, aiminisarenai ana, wenati matyotenehare tawitereharenai ana. ⁸Hoka hawawa aokowitereharenae, waiyexe mahokoanitereharenae hoka iniyalahare xema tyaonitereharenae ana atyoite haxeharene hotikihena. ⁹Hatyio xowakehenaite hoka wenati howitiharexe, exahe xamaikohaliti harenaite kaotyakehena tyotyia iniyalahare nomaseharenae ana. Judeunae ana hotohare ite kaotyaka, hatyaosetaite majudeuneharenae ana. ¹⁰Hoka Enore ite ihalaliti, xaiminisati, mehaxaikohaliti harenai isa tyotyia waiyexe tyomitereharenae ana. Judeunae ana hotohare ite isa. Hatyaosetaite majudeuneharenae ana. ¹¹Hiyaiya, Enore ana atyo tyotyia halitinae hakakoa hoka tyotyia halitinae hakakoa mokita.

¹²Majudeuneharenae atyo maisa Moisés xaotyakiraho kakoare xini hoka iniyalahare tyomehenaha hoka maisa atyo Moisés xaotyakiraho xema xini kamawenekoaretyakahitaha. Hoka judeunae atyo Moisés xaotyakiraho kakoare hoka iniyalahare tyomehenaha hoka hatyo xaotyakiyaho aokitere akereta atyo iniyalahare kaxomokakahitaha. ¹³Hiyaiya, Enore atyo maisa haliti waiyexe aokare Xaotyakiyaho semaxemaiterehare xini. Xaotyakiyaho aokitere akereta tyaonitereharenae atyo haliti waiyexe aokita.

¹⁴Majudeuneharenae atyo maisa Xaotyakiyaho kakoare xini. Hoka haxahokolaha ximita atyo tyaonahitaha Xaotyakiyaho aokitere akereta hoka hatyoha terota atyo haxaotyakira xema tyaonahitaha, maisa xakore atyo Moisés xaotyakiraho kakoareha xini hoka. ¹⁵Hawenaneha hiyeta atyo hotikisahitaha Xaotyakiyaho xairatyoare tyaonitere hamahiyaseha hiyexe. Exahokolaha atyo hatyoharenai aliterexe aokita ihiyeha. Hoka haiya xowaka examaikohalinikisahitene, exahe haiya xowaka hoka aihalahalikisahitene xoaha. ¹⁶Hoka hatyo akeretaite, exe Iraitio Waiyexe noxakaitere akereta, hatyo ferakenehena hoka Enore ite Jesus Cristo hiyeta hotikihetehena tyotyia halitinai xahekola metaharenai.

Judeunai, Xaotyakiyaho Xoaha

¹⁷Xoana kaisere hisaonita? Hiyaiya, judeu haokowita, Moisés xaotyakiraho hityakekota, exahe hahinitita Enore kakoa xoaha. ¹⁸Enore xahekola kakoa hawayoleta, exahe Xaotyakiyaho kakoa hikaxaotyakisakita waiyexe xema hisaona maheta. ¹⁹Aliterexe atyo maxoseharenai xotokahisase hiso, xaokanatyakalati akereta hisaonita makaliroti koni tyaoniterenai ana, ²⁰haotyakijita atyo mawayioreharenae, xoimanae xaotyakisase atyo hisaonita. Aliterexe atyo hiraeta, xaotyakiyaho nali atyo tyotyia waiyoliniti tyaonita, exahe xoalini hare aliterexe.

²¹Hiso haiyanai haotyakijitere, xoana hoka maisa hisota haotyakisoawiye? Kaiwati xakore hamahokoanetita hoka xoana hoka hiso atyo hikaiwita?

²²Ohiro mawatyalisakene xakore haokita hoka xoanere atyo hoka

hiwatyalita? Maisa xakore hawayiyetyare enore metalaharenai hoka xoana hoka hikaiwita hatyo enore metalaharenai hanakotare xiyehalitinai? ²³Hiso atyo hihalahareta Enore xaotyakiraho waiyekehalakiterehare homana kakoa hiyeta, xakore hoka hehaihalikijita atyo Enore, maisa exaotyakiraho akereta hisaonare hoka. ²⁴Hiyaiya, exakere atyo Iraití Waiyexe kaxairatyaka:

Majudeuneharenae atyo iniyalahare iraeta minita Enore tahi xiso judeunae hiyeta.

²⁵Xaiko nomanere milihisati xoalini hare tyoma homana, hiso judeu ana, Xaotyakiyaho aokitere akereta hisaona hoka. Xakore hoka maisaiya aokitere akereta hisaonita hoka motyaiya maxaikotyakahare ene hisaona.

²⁶Hoka majudeuneharenaia atyo maxaiko nomanere milihesakahareha, xakore hoka xaotyakiyaho aokitere akeretaia tyaonaha hoka Enoreya atyo exaiko nomanere milihesakaharenai akereta mokahene. ²⁷Nikare ite hoka xiso judeunaite xikairaharetyaka majudeuneharenai hiyeta. Hiyaiya, maisa atyo xaotyakiyaho akereta xisaonare, exairatyakahare xakore xaotyakiyaho xomana, exahe exaiko nomanere milihisakahare xakore xiso hoka. Xakore hoka majudeuneharenai atyo tyaonahitaha xaotyakiyaho xema, maisa xakore atyo kaxaiko nomanere milihisakereha xini eháreha hiye hoka.

²⁸Nikare hoka xala kaisere judeu, exahe aliterexe exaiko nomanere milihisakahare? Judeu kaiserehare atyo maisa etakehare henekoa maniya taita haháre hiyexe aikotiterehare xini. ²⁹Xakore hoka judeu kaiserehare atyo etakehare waiye ahekoiterehare, etakehare iniyalahare halakijiterehare. Enore Nisekohare atyo nikare mokitene hoka Xaotyakiyaho exairatyakahare atyo maisa xala hare nikare mokare. Hatyohare haliti atyo Enore tyakekota, maisa atyo halitinai xini.

3 ¹Nikare hoka xoare maheta judeu kaxaokowisaka? Exahe hoka xoare mahetaia womanere milihi kaxaikotyaka? ²Waiyehenaiya kahare maniyata. Exe hotohare: Enore halakisa hairaene judeunai ana. ³Hoka hatyaoseta? Nikare ite hoka haiyanaite maisa tyakekotene hoka hatyo hiyetaite Enore tehitiaite maisa tyakekohatiye xini tyaohena? ⁴Maisa atyo nikare xini! Exahe atyoite tyotyaha maoseratyareha taita hoka Enore atyoite hekota aliterexe niraetyashare tyaohena. Hiyaiya, exakere atyo nexa Iraití Waiyexe etahi:

“Maika himamaoseralahare hikaxaokaka hiraehena hoka exahe maika maisa xoare kawaiyakita hihiye hikairaharetyakehena hoka”, nexa.

⁵Nikareya hoka iniyalahare wománe hiyetaia, Enore maomaneharene iniyalahare hotikijita hoka xoare wehenaite? Nikarala hoka Enore ala maisa waiyexe, iniyalahare moka aokowihena wiso hoka? Kalini niraeta haiyanae iraetere akereta. ⁶Maiha nikarexe xini! Enoreya maisa waiyexe hoka aliyakereya axalihena halitinai? ⁷Nomaoserali hiyetaia Enore katyakekotyaka, exahe xoalini hare tyomiterehare waiyexe waiyekehalaka hoka xoanaiya hoka hekotata iniyalahare nokaxomokakihena, iniyalahare nomashare akereta? ⁸Xoanere

hoka maisa wexare: “Nika iniyalahare wisoma hoka hatyo iniyalahare hiyeta waiyexe kaotyaka”, wexare? Haiyaharenai atyo nikare niraeta aokahitaha hoka maoseratyahitaha. Hoka hatyonai atyoite maisa waiye xini kaxomokaka.

Maisa Xala Hare Waiyexe Aka

⁹Nikarala hoka wiso judeunae, majudeuneharenae xahehare nawaiye wisaonita? Maiha nikare xini! Hiyaiya, judeunae, majudeuneharenae xoaha atyo tyotyaha iniyalahare nomasehare makere. Koxaka hatyoharenae noxakai xihye. ¹⁰Hiyaiya, exakere Iraití Waiyexe nexa:

Maisa atyo xala hare waiyexe aka, maisa hatya hekoti.

¹¹Maiha xala hare ana Enore akiti waiyekehalakere, maisa xala hare taware Enore xahita.

¹²Tyotyaha haware tyaonahitaha Enore nonita, maisa xoare tyomareha, metaha atyo. Maisa xala hare waiyexe xema tyaonare, maisa hatya hekoti.

¹³Etororoneha atyo xawatyakalati majiholatyoare akereta tyaonita. Ininiseha hiyeta emaoseralaha hikoita hoka komaniyaita haliti.

Ekanasakotaha iniyalahare iraiti hikoita, owi naikoli xata kahe akerehare.

¹⁴Ekanasenaiha ako atyo iniyalahare taita tyaonita.

¹⁵Kaholawakahitaha hamokolaha exahe haxaisaneha haliti kakoa.

¹⁶Aliyo xamani xane tyaohenaha hoka nali mawenekoaretyahitaha, exahe xamaikohaliti harenae halakisahitaha.

¹⁷Maisa atyo wenati waiyexe akiti waiyekehalakere enomanaha.

¹⁸Exahe maisa atyo Enore aiminisareha.

¹⁹Hiyaiya, exehare atyo waiyekehalakita womana. Tyotyá xaotyakiraho iraetereharenai atyo xaotyakiyaho xema tyaonitereharenai anere. Hatyo hiyeta tyotyaha materaharetyoanehareha tyaonaha maheta, exahe tyotyá halitinai hoka iniyalahare nomaseharenai makere tyaona maheta Enore nahalakoa. ²⁰Hiyaiya, Enore ana atyo maisa xala hare waiyexe aka xaotyakiyaho aokitere akereta tyaonitere hiyeta. Hiyaiya, xaotyakiyaho atyo haliti ana hotikijita iniyalahare enómaneha.

Waiyexe Maniya Nawenatyakeheta Tyakekotyati Hiyeta

(Romanos 1.16-17; 4.5-8; 5.1; 8.1; Galat. 3.1-7)

²¹Hoka kalikini atyo Enore hotikisa halitinai ana haxaokane haomana akiti hoka haliti waiyexe aokahene maheta. Maisa atyo xaotyakiyaho hiyeta xini. Moisés xaotyakiraho, exahe iraiti xakaisaseharenai xoaha hatyohare tahi xakai. ²²Enore atyo haliti waiyexe aokita halitinae ityakekoneha Jesus Cristo hiyeta. Nikare atyo mokita tyotyá tyakekohenerenai. Hiyaiya, maisa atyo hatya hawareharexe xini hatya nonitata. ²³Hiyaiya, tyotyá atyo iniyalahare tyomaha hoka haware atyo tyaonahitaha wenati masakare waiyexe nonitata Enore nali. ²⁴Xakore hoka Enore atyo hawaiyexehare hiyeta maisa xoare aokita ihiyeha. Hoka haliti waiyexe aokahene, Jesus Cristo hiyeta

waiye maniya mohenahitene hoka. ²⁵Enore atyo axikatya Cristo, atyalihose xaimaholatyaka hiye wainihenere hiyeta halitinai tyakekone hoka, Cristo hiyeta kaxemaisatyakeheta iniyalahare enómanenaiha maheta. Nikare Enore tyoma hotikisa maheta waiyexe háomane. Toahiya xowaka maisa kaholawakita halitinai nómanenai iniyalahare kakoa. ²⁶Xakore hoka kalikini atyo axikatya Cristo hotikisa maheta waiyexe háomane. Nikare hoka Enore atyo waiyexe nomasehare hoka tyakekoterenai Jesus haliti waiyexe aokita.

²⁷Nikare ite hoka hatyoharenae hiyeta waokowiharetyoahena? Mahaiya! Xoanereya hoka maiha? Xoana wisaonitere Xaotyakiyaho hiyeta? Maisa nikarexe xini! Wityakekotere Cristo hiyeta. ²⁸Hatyoharenai hiyeta waiyekehalaka womana. Hiyaiya, Enore atyo haliti waiyexe aokita ityakekoneha hiyeta, maisa atyo xaotyakiyaho aokitere akereta tyaonitere hiyeta xini.

²⁹Hoka nikarala hoka Enore ala judeunai Nenorexa taita? Nikarala hoka maisala majudeuneharenae Nenorexa tehitiya xini? Há! majudeuneharenae Nenorexa tehitiya atyo. ³⁰Hiyaiya, Enore atyo haterore. Hoka haliti waiyexe aokita judeunae, majudeuneharenae harenae, ityakekoneha hiyeta. ³¹Nikarala hoka wityakekohenerere hiyetala wemaisatya Xaotyakiyaho? Maiha atyo nikarexe xini. Hekota atyo Xaotyakiyaho kakoaretata wisaonita, wikaiyakehetenerere najikinita.

Abraão Nawenane Tahí

4 ¹Hoka xoare wehenaite wahetakomaniyerehare Abraão xaokaka? Xoarala tyoma? ²Hiyaiya, enómane waiyexe hiyetaiya haliti waiyexe aokene Enore hoka nikareya hoka ehokoreya aokowiharetyoa. Xakore hoka mahaiya atyo Enore haotita xini. ³Hiyaiya, Iraití Waiyexe atyo nexa: Abraão tyakeko Enore hoka ityakekone hiyeta haliti waiyexe aokene.

⁴Xala xamani atyo hahena hoka kabakatyakita atyo. Hatyoharenae atyo maiha ekahinaetyaketerere xini, enomanere terota atyo hatyoharenae. ⁵Hoka xala xamaniya atyo maisa hakare Xaotyakiyaho aokitere akereta hoka Enoreya atyo ityakekone hiyeta haliti waiyexe aokene. Iniyalahare nomasehare xakoreya hoka haliti waiyexeya aokene Enore.

Waiyexe Maniya Nawenatyakeheta

(Romanos 6.23; 8.1-10; 1 Corint. 15.2-4; 2 Corint. 5.20-21)

⁶Exeharenai tahi Davi xakai aokowita etake Enore waiyexenai aohenerenai nihalaharene tahi irahenere xowaka. Iniyalahare enómaneha maotyaneheta hoka hatyo hiyeta haliti waiyexe aokahene.

⁷Waiye kaiserehare atyoite tyaohena haiyaharenae. Enore atyo iniyalahare enómanenaeha maotyaneheta, exahe enómane iniyalahare hoka emaisaheta.

⁸Waiye kaiserehare atyoite hatya haliti tyaonehena, Enore atyo iniyalahare enómane maotyaneheta hoka.

⁹Hoka xoana exe ihalalaliti tahi Davi irahenerala exaiko nomanere milihisakaharenae anere taita? Maiha. Maxaiko nomanere milihisakaharenae anere tehitiya. Hatyo hiyeta Iraitu Waiyexe nehenere wirahitiya:

Abraão tyakeko Enore hoka hatyo hiyeta haliti waiyexe aokene.

¹⁰Xoana xowaka Enore awaiyete? Xoana Abraão kaxaiko nomanere milihisakehenere nahitita, xoana enajikinita kore? Enahitita, maisa enajikinita xini. ¹¹Wahehena atyo hoka kaxaiko nomanere milihisaka. Hoka hatyo aikonomanere milihisoahenere atyo Abraão hotikisa maheta taita hatyakekone. Enore ityakekone hiyeta haliti waiyexe ahenerene, emaxaiko nomanere milihisakitaterere nahitita hiyeta. Hatyo hiyeta Abraão atyo tyotyta Enore tyakekohenerenai nexa, exahe haliti waiyexe aokahene, maisa xakore atyo kaxaiko nomanere milihisakereha hoka. ¹²Exahe tyotyta exaiko nomanere milihisakaharenae nexa tehitiya tyaona. Maiha exaikonomanere milihisakehenahere hiyeta xini. Xakore hoka Abraão tyakekone akereta tyahenahere hiyeta. Hiyaiya, Abraão tyakeko Enore hamaxaikonomanere milihisakaharene nahitita.

Enore Irae Abraão Hiye Hoka Tyakeko Iniraene

¹³Enore atyo halakisa aokowi waikohe Abraão ana, ijikohalaharenai xoaha ana. Nikare isa Abraão ana aokowi, xakore hoka maisa atyo Xaotyakiyaho xema tyaonitere hiyeta xini. Ityakekone hiyeta Enore haliti waiyexe aokene hoka waikohe isa enomana aokowi. ¹⁴Enore xalini hare isa aokowihenereya Xaotyakiyaho xema tyaoniterenae anere taita hoka nikareya hoka halitinae tyakekoneya maisa xoare tyomita. Exahe Enore xalini hare isa aokowitereharenaiya maisa xoare tyomita. ¹⁵Hiyaiya, Xaotyakiyaho hiyeta atyo Enore xeharene kaotyakita. Xakore hoka alyako xamani atyo maisa Xaotyakiyaho aka hoka maisa tehitiya atyo nali Xaotyakiyaho matyakekotyaka aka.

¹⁶Hiyaiya, tyakekoti hiyeta taita atyoite Enore tyotyta xalini hare isa aokowihenerenae Abraão jikolaharenae ana isa maxaimanahareta. Hatyoharenae maisa Xaotyakiyaho xema tyaoniterenae anere taita xini. Tyotyta Abraão tyakekone akereta tyakekohenerenae anere tehitiya. Hiyaiya, Abraão atyo wityotyta wexe. ¹⁷Exakere atyo nexa Iraitu Waiyexe: “Kahare haliti hotyalinai nexa atyo namoka hiso”, nexa Enore Abraão hiye.

Hatyo hiyeta Enore atyo isa aokowihenerehare xekohasehare tyaona, hatyo Abraão tyakekonehare, Enore kamatinai ekasekihitiere, exahe xalini hare makaotyakenehare hoka ekaotyakatitere. ¹⁸Maisa xakore aliyakere atyahaheta xaka hoka Abraão heko tyakeko, heko atyaha. Hatyo hiyeta kahare hotyalihare halitinae nexa tyaona. Exakere atyo nexa Iraitu Waiyexe: “Hijikolaharenaite hisoaka tyaona”, nexa.

¹⁹Abraão xakore okoi 100-wanonehena hoka maisa matyakekoneta. Ohiyehena, okoi xakore wainihena hoka heko tyakekota. Exahe exanityo

Sara hoka ohiyehena hoka maisaiya aliyakere kaisanita. Maisanityakohalo xakore hoka maisa Abraão matyakekoneta. ²⁰Abraão maisa halakijita hatyakekone, maisa matyakekotita Enore isa enomana aokowitereharenae. Ityakekone aiyatelikisene hoka hatyo hiyeta aexakeretya Enore.

²¹Waiyekehalakita atyo enomana Enore tyoma aokowitereharenae kakoa hoka. ²²Hatyo hiyeta, “Enore haliti waiyexe aoka Abraão ityakekone hiyeta”.

²³“Haliti waiyexe”, nehenere iraiti atyo maisa exaokaka taita xini iraeta. ²⁴Wiyaokaka tehitiya iraeta. Hiyaiya, wityakeko Wiyekohase Jesus xekasekisasehare Enore. Hatyo hiyeta Enore haliti waiyexe aoka wiso.

²⁵Jesus atyo kaxaxikatyaka iniyalahare wománe hiyeta waini maheta. Hatyaoseta kaxekasekisakeheta haliti waiyexe Enore aoka maheta wiso.

Wityakekone Hiyeta Atyo Enore Haliti Waiyexe Aokita Wiso

(Romanos 1.16-17; 3.21-26; 4.5; 8.1; Galat. 3.1-7)

5 ¹Kalini atyo Enore haliti waiyexe aoheta wiso wityakekone hiyeta hoka mehaxaikohaliti akeheta atyo womana, Wiyekohase Jesus Cristo hiyeta.

²Cristo atyo kolatya wiso wityakekone hiyeta Enore ana hoka waiye mokita wiso, hoka kalikini wikinatere wisaonita exema. Hatyo hiyeta wihalahareta Enore nali wiyanene akiti kakoa. ³Exahe wihalahareta tehitiya howitihare wisaonitereharenai kakoa. Hiyaiya, waiyekehalakita atyo womana: hatyohare howitihare wisaonitereharenai hiyeta atyo wimehexaikohare wisaonita. ⁴Hoka wimehexaikohare wisaonitere hiyeta atyo Enore tyakekota wiso. Hoka tyakekotere wiso hiyeta atyo watyahita Xekohaseti xahita. ⁵Hoka watyahitere hiyeta atyo maisa wamaikoharexe. Hiyaiya, Enore atyo isa womana hawaiyexehare, Isekohaliti Waiyexe isehenere womana hiyeta.

Cristo Atyo Waini Womana

(Romanos 4.24-25; 1 Corint. 15.2-4; Galat. 1.4; Tito 2.11-14)

⁶Enore xaimenekolaose xane hikoa hoka Cristo waini womana, wiso iniyalahare nomaseharenai ana. Hatyo nahitita maisa ene waiyexe wisomare.

⁷Hiyaiya, komitaineya maisa xala hare wainita hatya haliti waiye maniya tyaonitere wenekoare. Kala xoana xamaniya hoka nikarehare hiyetaiya hatya kinatyatyako waini hatya haliti waiyexe wenekoare. ⁸Hoka Enore atyo hotikisa hawaiyexehare womana. Hiyaiya, iniyalahare nomaseharenae xakore wiso hoka Cristo waini womana. ⁹Kalikini atyo Enore haliti waiyexe aoheta wiso Cristo wainihenere atyalihose xaimaholatyaka hiye hiyeta.

Hoka waiye kaiserehare atyo ite wisahena ihiyeta Enore xeharene nonitata. ¹⁰Enore nahalakoaharenae ene wiso, xakore hoka haisani kamane hiyeta hahinaehare aoheta wiso. Kalikini atyo Enore hinaeharenai wisaheta hoka wikaiyakehetehena atyo ite Cristo kasehetehenere hiyeta. ¹¹Hatyo hiyeta kalikini wihalahareta Enore kakoa, Wiyekohase Jesus Cristo hiyeta. Hatyo atyo Enore hinaeharenai moheta wiso.

Adão, Cristo Xoaha

¹²Iniyalahare atyo waikohekoa kaotyaka haterore haliti hiyeta. Hoka hatyo iniyalahare hiyeta kamati kaotyaka. Hoka kamati exaoretyoa tyotyaha halitinae ana. Hiyaiya, tyotyaha atyo iniyalahare tyomaha.

¹³Halitinai ana Xaotyakiyaho makaotyakeneharetatere nahitita atyo koxaka terota iniyalahare tyaonita ali waikohekoa. Xakore hoka iniyalahare atyo maisa kawatyalisakere, maisa Xaotyakiyaho aka hoka.

¹⁴Hiyaiya, Adão xowakiyata kamati jiyahaotya tyotyaha haliti Moisés kijiya hoka waini tyotyaha. Maisa xakore atyo iniyalahare tyomareha Adão Enore niraene masemaxemala hoka iniyalahare tyomehenere akereta xini hoka.

Hoka Adão atyo aimenekoita kaotyakehenere tyoanene. ¹⁵Xakore hoka hatyo hinamaharenai atyo hawareharexe makere. Hiyaiya, Enore waiyexe ijitereharenae kakoaiya atyo maisa aliyakere Adão iniyalahare tyomehenere kakoa kaxaimenekotyakita. Aliterexe atyo kahare haliti waini haterore haliti iniyalahare tyomehenere hiyeta. Xakore hoka Enore waiyexe ijitereharenae atyo exahehare, hoka hatyo hiyeta wenati waiyexe maxaimaneharetata ijita kahare haliti ana haterore haliti xawaiyera wiso hiyeta. Hatyo haliti atyo Jesus Cristo.

¹⁶Hahekorexe atyo Enore waiyexe ijiterehare nonitata hatya haliti iniyalahare tyomehenere. Iniyalahare tyomehenere hiyeta atyo mawenekoaretyati aho kaotyaka haterore iniyalahare tyomehenere hiyeta. Xakore hoka hawaiyexeharene hiyeta atyo Enore maxaimaneharetata haliti waiyexe aokita kahare iniyalahare tyomitereharenae. ¹⁷Aliterexe atyo haterore haliti nómane iniyalahare hiyeta kamati kaotyaka tyotyaha halitinae ana. Xakore hoka Jesus Cristo tyomehenere atyo exahehare tyaona. Hatyo hiyetaite Enore tyotyaha aohenerenae, exahe wenati waiyexe isehenere enomanaha hiyetaite waiye tyaonaha Cristo hiyeta.

¹⁸Hiyaiya, haterore iniyalahare tyoma hoka hatyo atyo tyotyaha halitinae nawenane aiyalaharetya. Nikare tehitiya hatya haliti waiyexe taita tyoma hoka tyotyaha iyehenahitene hoka wenati waiyexe isa enomanaha.

¹⁹Haterore haliti matyakekohenere Enore hiyeta tyotyaha halitinae iniyalahare nomasehare tyaonaha. Nikareta tehitiya ite haterore haliti tyakekone hiyetaite Enore haliti waiyexe aokahene.

²⁰Xaotyakiyaho atyo kaotyaka iniyalahare aeroretya maheta. Hatyo iniyalahare aeroretyoahenere hiyeta atyo Enore xawaiyera exahehare tyaona. ²¹Hiyaiya, iniyalahare kinatere tyaona kamati hiyeta. Nikareta tehitiya Enore xawaiyera kinatere tyaona wenati waiyexe hiyeta hoka ijita womana wenati matyotenehare, Wiyekohase Jesus Cristo hiyeta.

Cristo Hiyeta Waitare Wenati Tyaona

6 ¹Xoare wehenaite hatyo hiyeta? Nikare ite hoka heko iniyalahare wisomehena, Enore xawaiyera exahehare tyaona maheta? ²Maiha nikare xini. Koxaka atyo wenati iniyalahare ana wiwaini hoka aliyakereya heko

iniyalahare wisomehena? ³Exehare akiti ala waiyekehalakita xomana naoka. Hiyaiya, wikabatixatyakehena atyo haxawalita wisaona maheta Jesus Cristo kakoa, exahe wikabatixatyaka tehitiya atyo haxawalita ekakoa wainitere akereta wiwaini maheta. ⁴Hatyoy hiyeta wikabatixatyakehenere xowaka atyo ehakakoaneta wikaxafityaka, wainihenere akereta atyo wiwaini. Nikare wisaona Cristo kaxekasekisakehetehenere Enexe niyatero waiyexe hiyeta akereta tehitiya wikaseheta hoka waitare wenati xema wisaoheta maheta.

⁵Hiyaiya, haxawalitaiya atyo wiwaini ekakoa ekamane akereta hoka nikare tehitiyaite kasehetehenere akereta haxawalita wikaxekasekisakeheta.

⁶Hiyaiya, exehare atyo waiyekehalakita womana. Toahiyere iniyalahare wománe hiyeta wikaxaisaka Cristo kakoa atyalihose xaimaholatyaka hiye, wawenane toahiyere kamawenekoaretyakeheta maheta. Hoka hatyo hiyeta maisa atyo iniyalahare anerenaiheta xini wiso.

⁷Hiyaiya, hatyaiya atyo waini hoka maisaiya atyo aliyakere iniyalahare tyomehitita. ⁸Koxaka atyo Cristo kakoa wiwaini hoka wityakekota tehitiya atyo wikaseneheta ekakoa. ⁹Cristo atyo kaxekasekisakeheta hoka maisaiya atyo wainihitita, makamanehare atyo tyaona. Hoka hatyo kamati atyoite maisa xoana mohenahititene. Hatyohare akiti atyo waiyekehalakita womana. ¹⁰Wainihenere atyo iniyalahare ana waini hoka hakirore atyo nikare tyaona matyotenehare niyahare. Hoka kalikiniye enawenane atyo Enore anere.

¹¹Maikaira nikareta tehitiya ekamane akereta xisaohena iniyalahare xománe ana, xakore hoka xikaseta atyoite Enore koamaniya, Jesus Cristo kakoa haxawalita xisaonitere hiyeta. ¹²Hiyeta hoka awa atyo iniyalahare jiyahaoty xiháre wainiterehare hoka toahiyere iniyalahare kaxawaiyetyakitereharenae xema moka xiso. ¹³Awaira atyo ininae hekoti xiháre hiyetare iniyalahare ana xahalakihena, iniyalahare xisoma maheta. Xakore hoka Enore koamaniya taitaira xamohena xawenane, kaxaisakehenerenai kaiyakihititere exaisakaha nonitata akereta. Maika Enore maniya taita xamoka xawenane, xoalini hare waiyexe xisoma maheta. ¹⁴Maika maisa iniyalahare jiyahaotita xiso. Hiyaiya, maiha atyo Xaotyakiyaho xema xini xisaonita, xakore hoka Enore xawaiyeraho xema atyo xisaonita.

Enore Wakaneharenae

¹⁵Xoanere? Iniyalahare ite wisomehena, maiha tyare atyo judeunae Xaotyakiraho xema xini wisaonita hoka? Xakore hoka Enore xawaiyeraho xema tyare atyo wisaonita hoka? Maisa nikarexe xini. ¹⁶Waiyekehalakita atyo xomana exeharenai: Hiyaiya, hatya haliti wakanehare atyo xisaohena hoka xityakekota iniraene, aliterexe ewakanehare xiso hoka. Hatyo hiyeta xoana xityakekohenaite iniyalahare hoka hatyo hiyeta xiwainihena, xoana xityakekohena xamanite Enore hoka haliti waiyexe aohena xiso. ¹⁷Toahiya ene atyo iniyalahare xema taita xisaonita. Hoka kalikini atyo Enore xaotyakira kaxakaisaka xihiyé hoka xihalaharene kakoa xisaonita exema. Hatyo hiyeta nihalahareta Enore kakoa. ¹⁸Iniyalahare nonitata atyo xikaiyakeheta hoka Enore wakanehare xisaoheta

hoka aokitere akereta xisaona maheta. ¹⁹Maisa atyo metahare xini niraeta xikakoa ximaiyaterene hiyeta. Toahiya ene iniyalahare xema taita xisaonita, iniyalahare xisoma maheta. Hoka maika kalikini Enore xema xisaohena hoka ewakaneharenai xisaona hoka waiyexe wenati xema xisaoheta maheta.

Waiyexe Maniya Nawenatyakeheta

(Atos 4.11-12; Romanos 4.6-8; 8.1-10; 2 Corint. 5.20-21; Efés. 1.7)

²⁰Iniyalahare xema xisaonitere xowaka maisa Enore aokitere akereta xisaonare ene. ²¹Xoareharenae kaotyaka xomana toahiya iniyalahare xisoma hoka kalikini hatyoharenae kakoa xihaiharehititere? Hatyoharenae hiyeta atyo kawainisakita. ²²Xakore hoka kalikini atyo iniyalahare nonitata xikaiyakeheta hoka Enore wakaneharenai atyo xisaoheta. Kalikini atyo enomanerena terota xisaoheta hoka hatyo hiyeta wenati matyotenehare ite tyaona xomana. ²³Iniyalahare wisomitere hiyeta atyo wiwainita. Xakore hoka Enore maxaimaneharetia ijiterehare atyo wenati matyotenehare ekaotyakahitita, Wiyekohase Jesus Cristo koamaniya wisaonitere hiyeta.

Wenakakoati Hiye Aimenekotya

7 ¹Nohinaeharenae, kalaite niraehena hoka waiyekehalaka xomana, xawaiyoretyare Xaotyakiyaho kakoa hoka. Hatya haliti kasetatere xowaka taita atyo halitinai xaotyakiraho xema tyaonita. ²Hatya ohiro kaiyanenero atyo exanene kasetatere xowaka haiyanene niraene xema tyaonita. Exanene atyo wainihena hoka maisa atyo haiyanene niraene xema xini tyaohitita. ³Exaneniyia kasetata hoka xane hatya ena kakoa tyaona hoka iniyalahare nomasehaloiya atyo kaxaokaka. Exaneniyia waini hoka xane hatya ena kakoa tyaohitiya hoka ehokore, maisaiya atyo iniyalahare nomasehalo kaxaokakita. ⁴Hiyaiya, nikare atyo xisaonita, nohinaeharenae. Xiso tehitiya atyo koxaka xiwaini Cristo kakoa haxawalita hoka hatyo hiyeta Xaotyakiyaho atyo maisa xoare tyomehetere xomana. Hoka kalikini atyo enomanerena xisaona. Kaseheta atyo waiye wawenane tyaona maheta Enore koamaniya. ⁵Hoka toahiya wiyahekola ximita wisaonitere xowaka atyo xaotyakiyaho atyo hotikisa womana iniyalahare wiyahekola tyaonitere wiháre hiye hoka hatyo hiyeta wiwaini. ⁶Xakore hoka kalikini atyo maisa Xaotyakiyaho xema xini wisaonita. Hiyaiya, koxaka atyo wiwaini mawaiye nawenanititere wiso ana. Kalikini atyo waiye wisaoheta Enore aokitere akereta wisaona maheta. Enore nisekohare atyo wenati waitare iseheta womana. Hatyo hiyeta maisa atyo toahiyere Xaotyakiyaho exairatyakahare tyaonitere anereheta xini wiso.

Xaotyakiyaho, Iniyalahare Xoaha

⁷Xoare wehenaite? Xaotyakiyaho ala nikare hoka iniyalahare? Maiha nikare xini. Xaotyakiyaho atyo awaiyekehalakatya nomani iniyalahare akiti. Hiyaiya, Xaotyakiyaho atyo nexa: “Awa atyo hatya xiyehare himaiyase hoka

haokene homana”, nexa hoka ikoiya awa hatyo hoka maisaiya waiyekehalakita nomani hatyo akiti. ⁸Hoka iniyalahare atyo Xaotyakiyaho hiyeta hoka tyotyta xoalini hare nomaiyasetereharenai hotikisa nomani. Hiyaiya, iniyalahare atyo haware tyaonita xaotyakiyaho nonitata hoka maisa xoare tyomita. ⁹Hiyaiya, toahiya Xaotyakiyaho nomásemaniharetatere xowaka waiye ene notyaonita hoka nasemehenere Xaotyakiyaho xowakata iniyalahare aeroretyoa hoka aisa natyo. ¹⁰Xaotyakiyaho atyo wenati waiyexe isa nomani mahetareta ene hoka axaisakisa natyo. ¹¹Hiyaiya, iniyalahare atyo Xaotyakiyaho hiyeta maoseratya natyo hoka hatyo Xaotyakiyaho hiyeta iniyalahare aisa natyo.

¹²Hiyaiya, Xaotyakiyaho atyo aliterexe waiye, exahe iraiti hoka waiyexe kaiserehare. ¹³Nikarala hoka waiyexe hiyeta noxaisaki kaotyaka? Maiha atyo nikare xini! Iniyalahare atyo nikare axomokanikisa natyo. Hiyaiya, iniyalahare atyo waiyexe hiyeta noxaisaki ekaotyakatya nomani. Nikare tyaona iniyalaharaho kahotikisaka maheta. Hatyo hiyeta, xaotyakiyaho hiyeta, iniyalahare exahehare henehare tyaota.

Maisa Notyoma Naokowiterehare Notyomare

¹⁴Xaotyakiyaho atyo Enore nalitare hoka natyo atyo haliti maiyaterehare. Hiyeta hoka iniyalahare ana nokahalakisaki. ¹⁵Maisa atyo notyomitereharenae waiyekehalakere nomani. Hiyaiya, maisa atyo notyoma naokowitereharenae xini notyomita, xakore hoka nomaomani naokowiterehare taita atyo notyomita.

¹⁶Nomaomani naokowiterehare notyomitere hiyeta atyo Xaotyakiyaho notyakekota, exahe aliterexe waiyexe. ¹⁷Hatyohare hiyeta waiyekehalaka nomani. Maiha atyo natyo xini hatyohare notyomita. Iniyalahare tyaonitere nohiye atyo nikare axomokanikijita natyo. ¹⁸Hiyaiya, waiyexe atyo maisa tyaonare nohiye. Hatyo atyo nawenani. Waiyexe noxahekoli xakore notyoma naokowita hoka maisa terota hatyoharenae notyomare. ¹⁹Hiyaiya, maisa atyo waiyexe notyoma naokowitereharenae notyomare xakore hoka nomaomani iniyalahare naokowitereharenae atyo notyomita. ²⁰Nomaomani naokowitereharenae atyo notyomehena hoka maisa atyo natyo xini hatyoharenae notyomita. Iniyalahare tyaonita nohiye hoka hatyo atyo nikare axomokanikijita natyo.

²¹Hatyo hiyeta exakerala nawenani tyaonita naoka: notyoma naokowihena xoalini hare waiyexe hoka iniyalahare taita notyomita. ²²Enore Xaotyakiraho atyo waiyeta nomani, hatyohare kakoa nawaiyoreta. ²³Xakore hoka hatya xaotyakiye hawareharexe atyo heko aiyateretyoita noxahiti, waiyexe notyoma naokowitereharenae maisa notyoma aokare hoka. Hatyo hiyeta atyo iniyalahare tyaonitere noháre hiye wakanehare notyaonita. ²⁴Natyo atyo haliti maihalaharenehare. Xalaite iyehetehena natyo exe nomawenekoaretyakaho nonitata? ²⁵Wiyekohase Jesus Cristo ite iyehetehena natyo, hatyo hiyeta nihalahareta Enore kakoa.

Hiyeta hoka exakerexe tyaonita nawenani: noxahekoli hiye hoka Enore xaotyakiraho notyaonita, xakore hoka iniyalahare xaotyakiye xema kaisere atyo notyaonita.

Isekohaliti Waiyexe Xema Nawenatyaka

(Romanos 1.16-17; 3.21-26; Efés. 2.8-9)

8 ¹Hiyeta hoka kalikiniya atyo maisa xoare xemere kamawenekoaretyakihitita Jesus Cristo koamaniya tyaoniterenae. ²Enore Nisekohare aotyakisa wiso hoka exaotyakira atyo Cristo koamaniya moheta wiso. Exahe hoka iyeheta natyo wenati iniyalahare nonitata, exahe nomawenekoaretyaki xoaha nonitata. ³Wiso halitinae atyo maisa wikinaterexe hoka hatyo hiyeta Moisés Xaotyakiraho maisa aliyakere kahinaetita wiso. Xakore hoka Enore atyo haisani axikatya iniyalahare halitinae tyomitereharenae emaisaheta maheta. Ityani atyo wiso halitinae akereta tyoa hoka iniyalahare wisomiterehare emaisaheta maheta.

⁴Nikare Enore tyoma Xaotyakiyaho irahenere aokitere akereta kaiserehare wisaona maheta. Hiyaiya, Xaotyakiyaho iratere atyo waiye. Hoka Enore Nisekohare aokitere akereta atyo wisaonita hoka maisa atyo haliti xahekola iniyalahare xema xini wisaonita. ⁵Haiyanae atyo haxahekola xema taita tyaonahitaha hoka hatyo aokitere akereta atyo tyaonahitaha. Hoka Enore Nisekohare xema tyaoniterenae atyo Isekohaliti aokitere akereta exahekolaha tyaonita. ⁶Haliti xahekola xema taita kawenatyakiterehare atyo axaisakisare. Hoka Isekohaliti aokitere akereta kawenatyakiterehare atyo wenati waiyexe, exahe mehexasikohaliti xoaha maniya mokita haliti.

⁷Hiyeta hoka hatya haliti Enore nahalakoahare tyaonita, haliti xahekola xema taita tyaohena hoka. Maisa atyo Enore Xaotyakiraho xema tyaonare hoka, exahe maisaiya aliyakere tyaonita exema. ⁸Xalanae xamaniya atyo haxahekola xema taita tyaonita hoka maisaiya atyo aliyakere Enore aihalahalinijikijita.

⁹Hoka xiso atyo maisa halitinae xahekola akereta xini xisaonita, xakore hoka Enore Nisekohare aokitere akereta atyo xisaonita, aliterexe hareya atyo Enore Nisekohare tyaonita xikakoa hoka. Xalanae xamani atyo maisa Cristo Nisekohare kakoare xini hoka maisa atyo Cristo anerenai xini. ¹⁰Hoka aliterexeya atyo Cristo tyaonita xikakoa hoka xiharenae xakoreya atyo waini iniyalahare xománe hiyeta hoka Enore Nisekohareya atyo wenati waiyexe isa xomana. Hiyaiya, Enore atyo haliti waiyexe aoka xiso. ¹¹Enore atyo ekasekiheta Jesus. Hatyo Nisekohareya atyo tyaonita xikakoa hoka Cristo ekasekihetehenere akereta tehitiaite ekasekiheta xiháre wainitere, Inisekohare tyaonitere xihiyehiyeta.

¹²Xasemehena nohinaeharenae, maisaiya aliyakere wiyahékola xema taita wisaonita. ¹³Xiyahékola xema taitaiya xisaona hoka xikamane ana atyo xiyaneta. Xakore hoka Enore Nisekohareya atyo emaisatya iniyalahare xisomitere hoka wenati waiyexe anaite xiyane xahikoa. ¹⁴Hiyaiya, tyotyta Enore Nisekohare kaxaikoneharenai atyo Enore ityaninae. ¹⁵Isekohaliti Enore isehenere xomana

atyo maisa wakahare akereta mokare xiso, exahe ximamairanehare atyo mokita. Hatyo Isekohaliti hiyeta atyo Enore ityaninae xisaona. Exahe Isekohaliti hiyeta tehitiya hoka wihalaharene kakoa Enore hiye, “Abá, Abá”, wita.

¹⁶Enore Nisekohare atyo haxawalita tyaonita wisekoharenae kakoa hoka Enore ityaninai terota waokowi maheta. ¹⁷Enore ityani tyare atyo wisaona hoka xoalini hare waiyexe ite womanere tyaona hakaxaikoneharenae ana mokitereharenae. Nikare tehitiyaite xoalini hare waiyexe Enore Cristo ana mokitere womanere tehitiya tyaona. Iniyalahare kaxomokakehenere Cristo akereta wikaxomokakehenere hiyeta atyoite xoalinihare waiyexe, tyaonitere enomanere tehitiya womanere tyaona.

Waiyexe Watyahitere

¹⁸Nomani atyo iniyalahare wikaxomokakitereharenai ali waikohekoa kakoaiya maisa aliyakere kaxaimenekotyakita wenati waiyexe kahotikisakehenere womana kakoa naokita. ¹⁹Tyotya xoalini hare Enore nómanenai haholawaka kakoa atyahahitaha Enore ityaninae kaokeneheta xahita. ²⁰Hiyaiya, tyotya Enore nómanenai atyo maisa waiye tyaohitita. Maiha atyo haxaokalahitaha xini nikare tyaonaha, Enore xaokala ximita atyo nikare tyaonaha. Xakore hoka exehare atyo kaxatyahakita: ²¹Haxowakaite tyotya Enore tyomehenerenaite kaiyakeheta iniyalahare kaxomokakahitere nonitata, hoka Enore haisaninai waiye mohenerere xowakaite, waiye tehitiya kaxomokakehenahitaha. ²²Hiyaiya, Enore tyomehenerena atyo kalikini kijiya waolitita, ohiro ityani kawehena hoka waolititere akereta.

²³Maisa atyo Enore tyomehenerenai taita xini waolitita. Wiso tehitiya xakore Enore Nisekohare kakoare hoka wiwaolitita. Watyahitere Enore haisani aohenere wiso nase, exahe wiháre hoka waiyexe maniya mohetehenerere nase. ²⁴Hiyaiya, wiyatyahane hiyeta atyo wikaiyakeheta. Xakore hoka wiyaitaiya atyo watyahitere hoka hatyohare atyo maisa xatyahati xini. Hiyaiya, xala hare ala atyahita xoalini hare waiyitereharenai xahita? ²⁵Xakore hoka xoare xamani atyo maisa wiyaiyare hoka wimamaxaharehareneta kakoa atyoite watyahahena exahita.

²⁶Nikare tehitiya Enore Nisekohare kahinaetita wiso wimaiyatereharene hiyeta. Maisa wawaiyorexe wiraexala kakoa, xakore hoka Enore Nisekohare, wiwaolitita akereta mokita wiso hoka axita witahi, komita maisa eneya maisa aliyakere wiraene kakoa hatyoharenai wawaiyekehalakaita. ²⁷Enore atyo halitinae xahekola waiyita, exahe Isekohaliti Waiyexe xahekola hoka waiyekehalakita enomana. Hoka Isekohaliti Waiyexe atyo kahinaetita Enore kaxaikoneharenae hoka axita witahi Enore aokitere akereta. ²⁸Hiyaiya, waiyekehalakita atyo womana: Exahe tyotya xoalini hare kaotyakiterena womana hoka Enore hakita tyotya hatyoharenae koni, exawaiyetyaseharenai, exahe haomana aohenereharenae waiye tyaonaha maheta. Haxaokala ximita.

²⁹Toahiya xowakita atyo Enore koxaka haiyanae haomanere terota aokita hoka haware tehitiya mokahitahene hoka Ityani Jesus akereta

tyaonaha maheta. Jesus Cristo ximarene kahare halitinai tyaona maheta nikare Enore mokahene. ³⁰Nikare Enore haomanere aohenerenai kawisa. Maisa kawisahene taita xini, haliti waiyexe aokahene tehitiya. Maisa haliti waiyexe taita xini aokahene, exahe iraka tehitiya enomanaha waiyexe tyaonitere enáli maheta.

Enore Xawaiyera Wiso Jesus Cristo Hiyeta
(*Romanos 16.25; 1 Corint. 1.8; Filip. 1.6; Judas 24-25*)

³¹Exeharenæ hiyetaite xoare wehena? Enoreya atyo kahinaetita wiso hoka xalaiya jiyahaohena wiso? ³²Maisa atyo Haisani makamanene hekoti aokita hoka axikatene iniyalahare wománe hiyeta waini maheta. Hiyaiya, Haisani atyo axikatya, waini maheta iniyalahare wománe hiyeta hoka xoana maisaiyaka tyotya xalini hare waiyexe maxaimanehareta ijita tehitiya womana? ³³Xalaiya iraharehena Enore kaxaikoneharenæ? Maisaiya xala. Enoreta atyo iniyalahare maomaneharenai aokahene. ³⁴Hoka xalaiya iniyalahare exomokaka aohena? Hiyaiya, Cristo atyo waini enomanaha, exahe kaxekasekisakeheta hoka Enore fihini maniya tyaonita. Hoka iraeta witahi Enore hiye. ³⁵Nikare hoka xalaite kikihena wiso Cristo xawaiyera nonitata? Xoana, kirakoane wisaoniterehare, howitiharexe wawenane, wirawaiyaka, winaka, wimaxiyehareharene, kaheneharexe, exahe xoana wikamane kore ite kikihena wiso?

³⁶Exakere atyo Iraití Waiyexe nanekoa nexa:

Wawaiyetitere hiso hiyeta waha aka wikaxaisakita, motya etakehare kalanero kakolatyaka hoka kaxaisakiterehare xaisakalati hana nali akereta wikaxomokakita.

³⁷Nikare xakore atyo wikaxomokakita hoka hatyoharenai atyo wijiyaahotya, awaiyehenere wiso niyaterere hiyeta. ³⁸Hiyaiya, nomani atyo maisaiya xoare hekoti kikihitita wiso Enore xawaiyera nonitata. Mahaiya wikamane, wikasene, anjonai, haiyanai xekohasetinai, xoana tihanarenai, exahe kalikiniye wawenane, wahetakomaniyere wawenane hekoti hoka kikihitita wiso enonita. ³⁹Mahaiya wihaokoa maniya tyaonitere, wikatyaha maniya tyaonitere harenai hekoti kikihitita wiso. Hakákoare exe enokoa, waikohekoa tyaonitere konitareya, maisa hatya hekoti hatyonai kikihitita wiso Enore xawaiyera nonitata, Wiyekohase Jesus Cristo awaiyetitere wiso hiyeta.

Enore, Ekaxaikone Hotyalinai Xoaha

9 ¹Exe niraeterehare atyo aliterexe. Cristo anere atyo natyo hoka maisa namaoseratyare, Isekohaliti Waiyexe ana atyo waiyekehalakita exe niraetereharenæ hoka tyakekota niraini. ²Kalore namaikohareta, noxamaikohalini maisa tyotere, nohinaeharenæ nohotyaliharenai kaiserehare hiyeta. ³Waiyeya tyaonaha maheta komitaene atyo natyo Enore iniyalahare moka naokita, exahe Cristo nonitata hoka haware notyaoheta

naokowita. ⁴Enore kaxaikone hotyali terota atyo Israel hotyalinae. Haomanerenae atyo aokahene hoka wenati masakare waiyexe isa enomanaha aokowi. Iraitu Waiyexe xairatyoare, exahe Xaotyakiyaho hoka isa enomanaha hoka waiyoreha wenati Enore koamaniya kakoa. Xoalini hare waiyexe Enore isa enomanaha aokowihenerenai atyo enomanereha terota. ⁵Toahiyereharenae jikolahareha atyo, exahe Cristo tehitiya hoka toahiyereharenae jikolahare. Haliti tyaohenerere hiyeta, hatyo halitinae hotyalihare atyo tyaona. Hiyaiya, Enore atyo tyotyta halitinae xekohashare tyaona. Hoka maika kaihalaharetyaketa mene ekakoa. Nikare naoka.

⁶Maihatya Enore irahenerere atyo maisa xoare tyomita, nomita xini. Hiyaiya, maisa atyo tyotyta Israel hotyalinae Enore kaxaikoneharenai xini. ⁷Exahe maisa atyo tyotyta Abraão jikolaharenae Enore ityaninae xini. Hiyaiya, Enore atyo nexa Abraão hiye:

“Isaque jikolaharenae taita atyoite hijikolaharenae kaxaokaka”, nexa.

⁸Hatyto hiyeta Abraão jikolaharenai terota atyo kaxaokaka Enore irahenerere hiyeta tyaohenerenai. Hoka maisa atyo tyaotehenerenai xini ijikolaharenai kaxaokakita.

⁹Exakere atyo Enore irae:

“Notyohetaite hoka hatyo xowakaite Sara kaisanihena”, nexa.

¹⁰Exe tehitiya: hinamahare Rebeca ityaninai nexa atyo haterore, wahetakorehare Isaque. ¹¹Xakore hoka Enore atyo háhare nawenane waiyexe maniya moka hoka nexa Enore Rebeca hiye, hatyo xoimanae nawenane nahitita:

“Inityohaliti atyoite xoimere wakanehare tyaona”, nexa.

¹²Exakere nexa Enore iniyalahare, waiyexe xoaha enómaneha nahitita. Nikare atyo Enore tyoma exahe haxaokala ximita. Maiha atyo xoalini hare enómaneha hiyeta xini. ¹³Hiyaiya, exakere tehitiya Iraitu Waiyexe nexa:

Jacó atyo nawaiyitya hoka Esaú atyo maisa nawaiyetita, nexa.

¹⁴Nikare ite hoka xoare wehenaite? Enore maisa waiyexe wehenaite? Maisa nikarexe xini. ¹⁵Hiyaiya, exakere atyo nexa Moisés hiye:

Nairakoaneharetya naokowihenerere ite nairakoaneharetya, exahe nakanakaharetya naokowihenerere ite nakanakaharetya, nexa.

¹⁶Hatyto hiyeta maisa atyo wiyaokalita, exahe wománenai hiyeta xini, xakore hoka Enore xairakoaneharera wiso hiyeta taita atyo waiye wisaonita. ¹⁷Hiyaiya, exakerexe atyo xairatyoare tyaonita Iraitu Waiyexe nanekoa: Enore nexa Faraó hiye:

“Niyatere nahotikisa, exahe waikohekoa hakákoarekoa tyaoniterenai semaha notahi maheta kalorexe namoka hiso”, nexa.

¹⁸Hiyeta Enore atyo xala xamani airakoaneharetya aokowihena hoka airakoaneharetita, exahe xala xamani maxahekolatya aokowita hoka maxahekolaita.

Enore Xairakoaneharera, Iniyalahare Exomokala

¹⁹Hoka xinekonitare ite nehena nohiye: “Nikarexe hoka aliyakereya Enore hatya haliti iniyalahare nomasehare aohena? Xalaiya Enore aokiterehare mahokoanehena?”

²⁰Hoka xala atyo hiso hoka Enore kakoa kinityaxa hirae haokowita? Nikarala hoka kamohese nomaka tinihaliti haomasehare kakoa iraeta? “Xoana hoka exakere hisoma natyo?” nita. ²¹Hiyaiya, hatya haliti atyo kamohese tinihaliti tyomehena hoka aliyakere xamani mokene aokowihena hoka nikare mokitene. Kamohese haterore hiyetaiya hinama tinihaliti enomasehare tyoma, hatya waiye, hatya maisa waiyexe xoahaiya.

²²Nikare atyo Enore tyoma haxeharene hotikisa maheta, exahe haiyaterere hotikisa maheta. Nikare maisa maxahareta iniyalahare nomaseharenai kakoa, maisa xoare hare tyomita ekakoaha. Hamawenekoaretyakaho terota xakore xanahitaha hoka. ²³Hotikisa tehitiya aokowi Waiyexe Wenati maniya mohetehenere wiso. Hatyo hiyeta airakoaneharetya, exahe memere moka wiso isa maheta wenati waiyexe womana. Toahiyita atyo memere moka hatyoharenai hoka kalikini isene womana. ²⁴Hiyaiya, Enore atyo haomanerenae aoka wiso. Maisa judeunae taita xini haomanerenae aoka, majudeuneharenae tehitiya hoka haomanerenae aoka.

²⁵Nikarexe atyo Oséias nanekoa kaxairatyaka iniraene:

Xalanae ene xamani atyoite, exahe maisa nomaniye hotyalinae xini hoka nomaniye hotyalinae atyoite naokene. Xala hotyali xamani ene atyoite maisa nawaiyetyare hoka noxawaiyiriharenae atyoite naokahene.

²⁶Hatyo nanekoita exakerexe tehitiya:

“Xiso atyo maisa nokaxaikoni hotyali xini”, nexa xakore hoka Enore makamanehare ityaninae nerekatite exaokakaha.

²⁷Exakere Isaías irae Israel hotyali tahi:

Exahe xakore ite Israel hotyali hisoaka waikohese one kaloxere kilihi tyaonitere akereta hoka haiyanae taitaite waiyexe maniya tyaoheeta.

²⁸Enore ite hairaene akereta tyoma hakákoare waikohekoa. Maisaite wahita hekoti hoka nikare tyoma hairaene akereta.

²⁹Hatyo Isaías tehitiyita atyo koxaka nikare irae:

“Ikoiya awa Xekohaseti kinaterexe wijikolaharenai maheta haiyaharenai halakijita hoka wenakalati Sodoma akeretaiya moka wiso, Gomorra akeretaiya wisaona”, nexa.

Israel Hotyalinai, Iraitu Waiyexe

³⁰Nikare hoka xoare wehenaite? “Majudeuneharenae ana ene atyo maisa Enore koamaniya nawenatyaka waiyekehalakere, xakore hoka Enore atyo haliti waiyexe aokahene ityakekoneha hiyeta”, wehenaite.

³¹Hoka Enore haomanere aohenerenae Israel xakore atyo xaotyakiyaho

xema tyaona aokowiyahitaha, kasani hatyo hiyeta haliti waiyexe aokahene aokahitaha xakore hoka maisa atyo haliti waiyexe aokahitene.

³²Xoana hoka nikare tyaonaha? Motya maisa ityakekoneha hiyeta xini haliti waiyexe aokahene aokahitaha. Motya atyo enawenaneha xaotyakiyaho hiyeta Enore haliti waiyexe aokahene aokahitaha hoka. Nikare tyaonaha hoka “hisehityoaha hatyo sehali hisehityoakalati” hiye.

³³Hiyaiya, exakere atyo Iraitu Waiyexe nexa:

Namokaite Jerusalém nali sehali hoka hatyo hiye ite hisehityoaha hoka exoaha. Xakore hoka xala xamani atyoite tyakekone hoka maisaiya maihalahareneta ekakoa.

10 ¹Xasemehena, nohinaeharenae, kasani Israel hotyali waiyexe maniya kaiyakeheta naokita. Hatyo hiyeta Enore hiye niraexaita etahiha. ²Enore koamaniya xakore atyo tyaona aokowiyahitaha hoka maisa atyo Enore koamaniya nawenatyakaho kakoa waiyorahitaha. Hatyoharenae waiyekehalakita nomani. ³Maisa waiyekehalakere enomanaha Enore aokiterehare haliti haomana akiti kakoa hoka tyaonahitaha haxahekolaha ximita. Maisa waiyeta enomanaha Enore aokiterehare haliti haomana. ⁴Hiyaiya, Cristo atyo xaotyakiyaho kamiyanetya, hoka tyotya tyakekohenerenai haliti waiyexe aoka maheta.

Waiyexe Maniya Nawenatyaka Atyo Tyotya Halitinae Anere

⁵Moisés atyo exakerexe xairatya Enore aokitere haliti haomana tahi akiti, Xaotyakiyaho xema tyaonitere hiyeta:

Xala xamani atyoite Xaotyakiyaho aokitere akereta taita tyaona hoka tyaota mene atyoite.

⁶Xakore hoka nexa atyo Enore aokitere haliti haomana ityakekone hiyeta akiti: “Awa atyo hisota haxoawi: Xalaite enokoa xeta xanehena?” Exakerexe atyo exe akiti: “Xalaite xane enokoata Cristo nolohetehena?” nita atyo.

⁷Awa atyo exakere hekoti haxehena: “Xalaite exoahena toloko hatekoakore?” Exakerexe atyo exe akiti: “Xalaite xane kolahetehena Cristo kamatinae tyaonitere nalita?” nita atyo.

⁸Exakere atyo nexa: “Enore niraene atyo hihaliya tyaonita, hikanasako, himahiyasako xoaha”. Exe Iraitu wiyakaihenere atyo katyakekotyaka maheta. ⁹“Notyakekota Xekohaseti Jesus”, hexaiya hiraeta hikanase kakoa, exahe hityakeko kaiserehare, Enore ekasekihetehenerene xoaha akiti hoka waiyexe maniyaiya hikaiyakeheta. ¹⁰Hiyaiya, wityakekota kaiserehare atyo hoka haliti waiyexe Enore aokita wiso. Wikanase kakoa atyo wiraeta wityakekone tahi hoka waiye maniya wikaxomokakihitita.

¹¹Hiyaiya, exakere atyo Iraitu Waiyexe nexa:

Xala xamani atyoite tyakekone hoka maisaiya maihalahareneta ekakoa, nexa.

¹²Tyotya haliti hotyalinae xaokaka atyo nikare iraeta. Hiyaiya, judeunae, majudeuneharenae xoaha atyo maisa hawareharexeha makere

xini. Enore atyo tyotyaha haliti Xekohase, exahe waiye mokita hoka xalanae xamani hakahinaetyaka aokita ihiyeta hoka kahinaetyahitene.

¹³Hiyaiya, exakere atyo Iraitu Waiyexe xairatyoare tyaonita:

Xala xamani atyoite hakahinaetyaka aoka Enore hiye hoka waiyexe maniyaita kaxomokakeheta, nexa.

¹⁴Hoka aliyakereya axehenaha, maisa xakore tyakekorahene hoka?

Hoka aliyakereya tyakekohenahene, maisa xakore iraitu semareha hoka?

Hoka aliyakereya semehenaha Iraitu xakore, maisa xalahare xakaiye

ihiyeha hoka? ¹⁵Hoka aliyakereya xakaihenaha, maxaxikatyakahare

iraitu xakaisaseharenai hoka? Hiyaiya, exakere atyo Iraitu Waiyexe nexa:

“Waiye kaiserehare atyo iraitu xakaisaseharenai kaoketehena hoka waiyexe tahi xakaihakohenaha hoka”, nexa.

¹⁶Xakore hoka maisa atyo tyotyaha tyakekoreha Iraitu Waiyexe. Isaías

exakere irae: “Xekohaseti, xala tyakeko Iraitu Waiyexe wiyakaihenerere?” nexa.

¹⁷Nikare tyakekoti kaotyaka Iraitu semaka hiyeta, exahe Iraitu atyo

kaotyaka Cristo tahi kaxakaisakitere hiyeta.

¹⁸Hoka natyo atyo naxita: Xoana maisa ala semahitaha Iraitu tahi?

Koxaka atyo semaha Iraitu. Exakere Iraitu Waiyexe nexa:

“Tyotyaha waikohekoa, tyotyaha wenakalatinaekoa tyaoniterenae semaha iniraeneha, exahe seko akiya tyaoniterenae hoka semahene”, nexa.

¹⁹Hoka naxehitiyaite: Xoana Israel hotyalinai anala maisa exeharenae

waiyekehalakita? Hiyaiya, Moisés hotohare atyo nexa:

“Naokoawahalinikisaite xiso halitinai hahotyaliita mawenaneharenai hiyeta, exahe naxehalinikisaite xiso halitinai mawaiyoreharenai hiyeta”, nexa.

²⁰Isaías maisa mairita hekoti hoka nexa:

Haiyaharenae xakore atyo maisa Enore tawareha hoka ekoamaniya tyaonaha, exahe maisa xakore axareha etahi akiti hoka kaotyaka enomanaha, nexa.

²¹Hoka exakere atyo Isaías nexa Israel hotyali tahi:

Fera nokahe naimatya exe halitinae masemaxemalaharenai, matyakekoneharenae ana hoka maiha terota, nexa.

Enore Xairakoaneharera Israel Yerenai

11 ¹Hatyohiyeta kalikini naxehitiya: Xoana Enore ala hakaxaikonehare hotyalinai maisa aokita haomana? Maisa nikarexe xini! Hiyaiya, natyo tehitiya atyo Israel hotyalihare, Abraão jikolahare, exahe Benjamim hotyalihare konitare. ²Enore atyo maisa maxaokalita haomanere hotyaliharenai, hetati xowakita aohenerenai haomana. Iraitu Waiyexe irahenerere akiti atyoala waiyekehalakita xomana Enore haotita, Elías Israel hotyali iraherehenerere tahi akiti. Exakere nexa:

³ Xekohaseti, hiraene xakaisaseharenae atyo aisaha, exahe xoalini hare kafetatyakitere homana aose hoka mawenekoaretyaha. Hoka nowawitehena nokasetata hoka kalini aisaha natyo aokowitaha.

⁴ Xoare nexa Enore ekoaxatene? Exakere nexa:

Waiye atyo namoka 7.000-hare halitinai nomaniye maheta, enore metalahare Baal koamaniya mawenaneharenai.

⁵ Hatyo akereta atyo kalikini tyaonita: Enore nawaiyexehare hiyeta haiyanai tyaonita exema haomanere aohenerenai. ⁶ Hawaiiyexehare hiyeta atyo Enore aokahene haomana, maisa atyo enómaneha hiyeta xini. Haliti tyomiterehare hiyetaiya aokahitene haomana hoka enawaiyexehareya atyo maisa xoarehare tyomare.

⁷ Xoare wehenaite? Israel hotyali tawiterehare maisa kaokahitaha. Hiyaiya, Enore haomanere aohenerenai taita kaokahene hoka haiyaharenae atyo matanakoakohare akereta tyaonaha, Enore niraene semaha hoka.

⁸ Hiyaiya, Iraitu Waiyexe atyo nexa:

Enore atyo kinatere moka emahiyaseha, exahe exahekolaha xoaha, hoka kalikini kijiyeheha maiha waiyakatyareha haxosenaiha kakoa, maiha semakatyareha hatanakoakonaiha kakoa, nitere akereta.

⁹ Hoka Davi atyo nexa:

Maikaite hisehaliti heko kaxotokakaha hoka kamaoseratyakaha. Nikare ite tyaonaha hoka iniyalahare ite kaxomokakaha.

¹⁰ Maikaite exosenaeha jihotyore tyaona hoka maisa waiyakahenahititaha. Exahe maika aonikoakoataha mene hawenaneha howitiharexe hiyeta, nexa.

¹¹ Kalikini naxehitiya: judeunae hisehityoahenere xowakala hisehityoaha hoka hamahakaisereneha ana hikoaha? Maisa nikarexe xini. Iniyalahare tyomaha hoka hatyo hiyeta wenati waiyexe tyaona majudeuneharenae ana hoka judeunae okoawahareha ihiyeha maheta.

¹² Judeunae iniyalahare tyomehenahere hiyeta atyo kalore wenati waiyexe kaotyaka tyotyaha haliti hotyalinae ana. Exahe ematyakekoneneha hiyeta atyo majudeuneharenae tyakekone kaotyaka enomanaha. Hoka judeunae haiyaharenai tyakekohetehenerenai Enore anaite xane hikoaheta hoka hatyo xowakaite masakare waiye kaiserehare wenati tyaothetehena.

Waiyexe Maniya Nawenatyakeheta Majudeuneharenai Hiyeta

¹³ Kalikini atyo niraeta xiso majudeuneharenae kakoa. Natyo tyare atyo majudeuneharenae ana terotere iraitu xakaisasehare notyaona hoka hatyo hiyeta nihalahareta nohateni kakoa. ¹⁴ Xoana xamaniya hoka exakere notyaona hoka nohinaeharenaiya okoawahare hoka hatyoharenai hiyetaiya haiyanae waiyexe maniya namoheta. ¹⁵ Hiyaiya, judeunae maxawaiyityakehenere hiyeta atyo tyotyaha haliti hotyalinae Enore hinaehare tyaona. Hoka xoanaite

tyaohenaha, kaxawaiyetyakehenahere xowaka? Hatyo xowaka atyoite kamatinae kasehetiterehare akereta tyaothetehena enawenaneha.

¹⁶Hetatiye tohase nakairati hiyetaiya kaxekaka Enore ana hoka mainikere tehitiya atyo enomanere. Nikare tehitiyaiya atya tyahare Enore ana kaxekaka hoka ekanohinae tehitiyaiya enomanere terota. ¹⁷Haiya kanohinai kataikaka oliveira exafityakahare kate hiyeta hoka hatya atya maxafityakahare kanohitare kaxomokaka ihiye. Xiso majudeuneharenae atyo hatyo atya maxafityakahare kanohi akereta hoka kalikini atyo judeunae niyaterere, exahe enawenaneha xoaha xomanere tyaotheta. ¹⁸Hatyo hiyeta awaira atyo ximaxawaiyerehena atya exafityakahare kanohinae kataikakehenerena kakoa. Xoanereya hoka xaokowiharetyoahena? Xisonae atyo atyakate kanohinai akereta taita. Maisa atyo xiso xini xaiyatelikijita atya tyahare. Atya tyahare atyo aiyatelikijita xiso.

¹⁹Xakore hoka xehenaite: “Atya kanohinae atyo kaxirikotyaka hoka hatyonae wenekoare wisaona maheta”, xehenaite. ²⁰Hiyaiya, ematyakekoneneha hiyeta atyo kaxirikotyakaha. Hoka xiso atyo atyakate hiye xikahiyalatyaka xityakekone hiyeta. Hatyoharenai waiyekehalakita xomana hoka awa atyo xaokowiharetyoa, xakore hoka maika ximairehena kaisere. ²¹Hiyaiya, Enore atyo maisa iniyalahare maxomokalita judeunai, atya kanohi kaiserehareha xakore atyo hoka. Hoka xoana xiyahekola hiye, motyaiyala maisa iniyalahare tehitiya mokita xiso xaokita?

²²Enore atyo waiyexehare, exahe xalijinihare tehitiya. Kaxirikotyakehenerena xahita atyo xalijinihareta hoka waiyexehareta atyo xihie, hekoiya enawaiyexehare xema xisaona hoka waiyeya mota mene xiso. Mahaiya hoka irikotyatehitiyaiya xiso.

²³Hiyaiya, judeunaiya halakisaha hamatyakekoneha hoka haikoahenahitahaiya hetati tyaonahitere akiti xeta. Hiyaiya, Enore atyo kintere hoka ehaikoakihenahiteniya. ²⁴Xiso majudeuneharenae atyo atya maxafityakahare kanohi kaxirikotyaka hoka atyakate exafityakahare hiye kahiyalatyakitere akereta. Hoka judeunae atyo atyakate exafityakahare kanohinai kaiserehare akereta. Hatyo hiyeta Enore anaiya atyo maisa howitihare hiyalatyakehitita atya kanohinai ekate hiyeta kaxirikotyakehenerahrenai.

Enore Awaitita Tyotyia Halitinae

²⁵Nohinaeharenae, kasani exe Iraitia Waiyexe metaharetere waiyekehalaka xomana naokita, maisa xaokowiharetyoa maheta, xawaiyore xaokowita maheta: Israel hotyalinai matyakekonene atyoite maisa tyoata minita. Majudeunehare hotyalinae konitarenai tyotyia tyakekohenahere Enore kijiya taitaite. ²⁶Hatyaosetaite tyotyia Israel hotyalinai waiyexe maniya kaxomokakeheta Iraitia Waiyexe irahenere akereta:

Haliti niyaseharehetaite Sião nalita tyoheta hoka tyotyia Jacó hotyaliharenae iniyalahare tyomitere emaisaheta.

²⁷ Nikare ite namokahene iniyalahare enómaneha nemaisahetehenere xowaka.

²⁸ Judeunae atyo maisa Iraití Waiyexe aokahita haomanaha hoka hatyo hiyeta Enore nahalakoahare tyaonaha, xiso majudeuneharenae hiyeta. Xakore hoka Enore atyo aokahene haomana enahetakomaniyereharenae hiyeta, hoka ihinaeharenae atyo tyaonaha. ²⁹ Hiyaiya, Enore atyo xala xamani aohena haomana, exahe waiye moka aokowihena hoka maisa atyo hahekore haxahékola mokare.

³⁰ Hoka xiso majudeuneharenae atyo toahiya maisa Enore niraene xityakekota. Xakore hoka kalikini atyo Enore airakoaneharetya xiso, judeunai matyakekonene hiyeta. ³¹ Nikare hatyo airakoaneharehenere xiso hiyeta, kalikini judeunai matyakekonahitaha Enore, hoka haxowakehenaite Enore airakoaneharetyahene maheta xihiyeta. ³² Hiyaiya, Enore atyo tyotyá matyakekoneharenai mokahene, hotíkisa maheta haxairakoaneharera tyotyá haliti hotyalinai ana.

Enore Xaexakeretyaka

³³ Kaxiyani, Enore atyo waiye kaiserehare! Tyotyá waiyekehalakita enomana, exahe waiyore. Xalaiya awaiyekehalakatya exahékolanai? Xala anaiya waiyekehalaka enawenane? ³⁴ Exakere atyo Iraití Waiyexe nanekoa nexa:

Xala anaite waiyekehalakehena Xekohaseti xahekola? Xalaiya aotyakihenene?

³⁵ Xala koxaka xalini hare Enore ana isa, Enore bakatene maheta?

³⁶ Hiyaiya, tyotyá xalini hare atyo enómanenai taita. Ihiyeta atyo tyotyá xalini hare kaotyaka, exahe hoka enomanerenae makere atyo. Hatyo hiyeta maika Enore kakoa kaihalaharetyaka matyotenehare! Nikare waoka. Eko xoaha.

Wenati Waitare

12 ¹ Hatyo hiyeta, nohinaeharenai, maika Enore airakoaneharetitere xiso hiyeta niraehena xikakoa: maika xiháre xisehena Enore ana, kinasetatere isoawitere akereta, ehatene xisoma maheta, exahe aokitere akereta xisaohena. Nikareya atyo xisaona hoka hatyoiya atyo aliterexe xisaonita ekoamaniya. ² Hoka awa atyo matyakekoneharenai tyaonitere akereta xisaona, xakore hoka maika kotare Enore waiye maniya moheta xiyahékolanai. Nikare ite hoka waiyekehalaka xomana Enore aokitereharenai, xoare xamani waiyexe, ehékorexe, exahe awaiyetitereharenai.

³ Enore hawaiyexehare hiyeta iyateliti isehenere nomani hiyeta niraehena xikakoa: Awa atyo hatya xinekonitare hatahi taita ahekohena, exahe hoka haiyanae xahexe nawaiye aokowihena. Maika waiye ahekotyá, Enore hatya ana xakini tyakekoti isehenere hiyeta. ⁴ Hiyaiya, wiháre kaxiyehare hoka hatya xakini atyo kahatenexe. ⁵ Nikare tehitiya wiso tyakekohenerenae. Wikahare xakore hoka Cristo hiyeta haterore wisaona. Hoka wityotyá hahotyalita wisaonita haiyanae hawareharexe haríti kaomakere kakoa.

Waiyoliniti, Iyateliti Waiyexe Enore Isa Halitini Ana
(1 Corint. 12.4-11; Efés. 4.9-12)

⁶Hatyo hiyeta nika wisomehena wihatene hawareharexe xakini, Enore isehenerehare womana hawaiyexehare hiyeta. Wihatene atyoite wiyakaini Enore niraene tahi hoka hatyoharenai atyoite wisomehena wityakekone hakakoaneta. ⁷Wahaka mahetaiya hoka wahaka. Waotyakisa mahetaiya hoka waotyakisa. ⁸Exahe waihalahalinikisa mahetaiya haiyanai hoka waihalahalinikisahene. Hatyaiya haxiyehare hiyeta isa aokowita haiyanae ana hoka maika haihalaharene kakoa isa. Xala xamaniya xekohaseti hoka hahatene kakoa irihare. Exahe xala tehitiya xamaniya haiyanae kahinaetya hoka haihalaharene kakoa kahinaetyahene.

Wenati Waiyexe

(Acts 10.35; Galat. 5.22-24; Efés. 4.1-3; 4.25-5.2)

⁹Maika xawaiyetya kaiserehare haiyanai. Xahalakihena iniyalahare hoka waiyexe xema taita xisaohena. ¹⁰Maika xihinaeharenae xihalaharene kakoa xawaiyetya, Cristo xema tyaonahitere hiyeta. Exahe maika waiyexe taita xisomehena haiyanai kakoa, xaiminisakakoa maheta. ¹¹Maika kalore xahaka, awa atyo ximaxahare. Xihalaharene kakoaira xahaka Xekohaseti ana. ¹²Heko xatyahahena Xekohaseti xahita xihalaharene kakoa, exahe xakore haiya xowaka xawenane howitihare tyaonita hoka heko ximamaxaharenehare xisaona hoka awa atyo xahalakihena xiraexala. ¹³Haiyanae Enore koamaniya tyaoniterenaes xoalini hare aokitereharenae kakoa xirakakakoahena xoare xamani xixaxiyehareta hoka. Exahe haiyanae kaokehena hoka waiye xamokahene xihanako.

¹⁴Enore hiye xiraehena kirawanetereharenae xiso waiye moka maheta. Xaxehenene hoka waiye mokene hoka awa atyo iniyalahare exomokakaha xaoka. ¹⁵Maika ihalahareterenaes kakoa xihalahare, exahe tiyitereharenaes kakoa hoka xitiya. ¹⁶Haiyanaes kakoa ximehexaiko xisaohena hahotyalita. Awa atyo xaokowiharetyoa, awa atyo ximaxawaiyera wakaharenaes, awa atyo kalore xawaiyore xaokowi.

¹⁷Awa atyo haiyanaes iniyalahare mohena xiso hoka hatyo nahalakoa iniyalahare xamokene. Maika xisomehena tyotyta halitinai waiyexe aokitereharenai. ¹⁸Exahe xoana xamani xixaxomokakehena hoka maika xaiyateretyoa hoka ximehexaikohare xisaona haiyanai kakoa. ¹⁹Nohinaeharenaes, maika hatya iniyalahare moka aokowihena xiso hoka awa atyo xikatolikoa xaokowi. Maika Enore ana xahalakisene hoka katolikoaretya xiso. Exakere atyo Iraiti Waiyexe nanekoa nexa:

“Natyo atyoite nakatolikoarehena xiso, exahe nabakahenahene”,
nexa Xekohaseti.

²⁰Iraiti Waiyexe nanekoa irahenere akereta xisaona:

Maika hahalakoahare nakita hoka nakairati hisa enomana hoka kanakaira, oinita hoka one hisa enomana hoka tera. Nikareya hisaona hoka hahalakoahare hehaihalikisa, nexa.

²¹Awa atyo iniyalahare xahalaisa hoka jiyahaotya xiso. Xaiyateretyoa hoka waiyexe kakoa iniyalahare xijiyahaotya.

Kalorexennai Xaiminisaka Tahī

13 ¹Maika tyotyā halitinai kalorexennai niraene tyakeko. Hiyaiya, maisa atyo hatya kalorexe tyaotere Enore maxaokalahareneta. Kalorexe tyaoniterennai atyo Enore xomokalanai. ²Nikareya xala xamani kalorexennai mahokoanetita hoka Enore axikahenerehare atyo mahokoanetita. Nikare tyaonitereharenai atyo hatyoahitaha iniyalahare maniya axomokanikisoahitaha. ³Hiyaiya, iniyalahare tyomitereharenae taitaiya atyo mairihena xekohasetinae. Hoka waiye tyaoniterennaiya atyo maisa xoare maheta mairahitaha. Maika atyo maisa himaira haokowiye xekohasetinae hoka waiyexe taita hisoma. Nikareya hisaona hoka ihalaharehaiya hikakoa. ⁴Enore ana atyo hakahitaha, kasani waiye maniya hisaona aokahitaha hoka. Iniyalahareya atyo hisaonita hoka himaira. Kalorexennae atyo kinatere hoka iniyalahareya mokaha hiso. Enore hatene atyo tyomahitaha hoka hatyo hiyetaiya iniyalahare mohenhaha xala xamani iniyalahare tyomita hoka. ⁵Hiyeta hoka maika xekohasetinae niraene hityakekohena. Maisa iniyalahare mokahitere Enore aokitere akereta hiyeta taita xini. Xakore hoka xahekore hiyeta tehitiya.

⁶Hiyeta hoka kalorexennai aokitereharenai xabakatya. Hiyaiya, hahateneha atyo tyomehenaha hoka Enore hatene atyo tyomahitaha. ⁷Hatyo hiyeta xabakahenaira xikakotanetereharahene. Xabakahena xekohasetinai xabakatya aokitereharenai, exahe xixiyeharenai hiyeta aokitereharenai xaimane hoka xabakahena. Maika xaiminisa tyotyā kalorexennae, exahe xityakekoahene.

Xawaiyetyakakoati Tahī

⁸Awa atyo haiyanai ximabakalahare xisaona. Awa atyo haiyanae ximaxawaiyerahare xisaona. Hiyaiya, xala xamaniya atyo haiyanae awaiyetita hoka Xaotyakiyaho xema atyo tyaonita. ⁹Exakere atyo Xaotyakiyaho nexa:

Awa atyo haiyanae nohiroxa hiwatyali, awa atyo haisa haliti, awa atyo hikaiwa, awa atyo hatya xiyehare himaiyase, nexa.

Tyotyā exennai, exahe haiyanai xoaha atyo kaxakiranetyaka hoka haterore Xaotyakiyaho tyaonaha hoka nexa:

Hawaiyehena haiyanae hawaiyetyoawitere akereta, nexa.

¹⁰Xala xamaniya atyo xawaiyetyati kakoare hoka maisaiya atyo iniyalahare mokita hahinaehare. Hatyo hiyeta wawaiyehena atyo hoka Xaotyakiyaho xema atyo wisaonita.

¹¹Maika nikare xisaohena, hiyaiya, waiyekehalakita atyo xomana kalikini wisaonitereharenai. Xiyaiya, kaosetyaose ferakene atyo xane hikoa. Hiyaiya,

waiyexe maniya wiyomokakeheta atyo maisa sekohetere kalikini, maisa atyo etake wityakekohenere xowaka akereta xini. ¹²Hiyaiya, makiya atyo tyotehena hoka ferakoahena atyo wihiye. Hatyo hiyeta nikahena hoka wahalakisa makaliroti koni anerenai hoka wiyaiyatelilisakala wiya hoka wikinatere wisaona xaokanatyakalati xema. ¹³Nikahena hoka waiyexe maniya taita wisaona haiyanae ferakoa tyaonitere akereta. Hoka wahalakihena kaisere wimaxaloharene, weratetyoane, ohiro hiye wawenane, xoalini hare kehaisakere, wiyalijinihare kakoane, wokoawahare kakoane harenae. ¹⁴Maika Wiyekohase Jesus Cristo niyatere kakoa xisaona, awa atyo iniyalahare kaxawaiyetyakitere xema xisaona.

Awa Atyo Iniyalahare Hihinaehare Hamoka Haokowi

14 ¹Maikaira kotare xinekoni xamoka xala xamani maisa kalore tyakekore hoka. Xakore hoka awa atyo exahekolanai hiyeta kinatyaxa xirae ekakoa. ²Hiyaiya, haiyanaiya atyo hatyakekoneha hiyeta kanakairaha tyotya xoalini harenai. Hoka haiyanaiya atyo maisa kalore tyakekoreha hoka atyali, exahe hananehaliti taitaiya atyo kanakairaha. ³Hoka maika hatyo tyotya xoalini harenai kanakairiterenai awa hahinaeharenai manakairiterenae maxaiminira. Exahe awa atyo hatya hananehaliti taita kanakairitere iraesekoatya hatyo tyotya xoalini harenai kanakairiterenai tahi. Hiyaiya, Enore atyo haomanere aokene. ⁴Xala atyo hiso hoka hiraeharetita hatya wakanehare? Exahiya, xoana heko xamani kinatere tyaona, exahe xoana maisa xamani kinatere tyaonita hoka exekohase atyoite ahekohena etahi. Hekoite kinatere tyaona. Xekohaseti atyoite aiyatelikisene.

⁵Haiyanae xahekola hiye atyo hoka haferakene atyo haiyanai ferakenenai xahexe nawaiye aokahitaha. Hoka haiyanai xahekola hiye atyo hoka ferakitinai nihatyaka atyo hakakoa ferakeneta. Hoka maika nikarehena hoka hatya xakini haxahekola xema tyaona. ⁶Xala ana xamani atyo haferakene masakare waiyeta hoka hatyo atyo Xekohaseti aiminijita, exahe ihalahareta atyo ekakoa. Xala xamani atyo kanakairita tyotya xoalini harenai hoka Xekohaseti atyo aiminijita, Enore kakoa atyo ihalahareta nakairati hiyeta. Nikare xala xamani maisa eteti harenai nisare hoka Xekohaseti atyo aiminijita, exahe Enore kakoa atyo ihalahareta.

⁷Maisa atyo womanita xini wisaonita, exahe maisa atyo womanita xini wiwainita. Xekohaseti anaiya atyo wisaonita hoka enomanere atyo wisaonita, ⁸exahe wiwainihena hoka Xekohaseti anere atyo wiwainita. Exaheya xoana wikaseta xamani, wiwainihena xamani hoka Xekohaseti anere atyo wisaonita. ⁹Hatyoharenae niyahare atyo Cristo waini, exahe kaseheta hoka kamatinae, kaseterenae xoaha Xekohase tyaona maheta. ¹⁰Hatyo hiyeta xoana hoka hihinaehare tahi hiraesekoaita? Exahe hatya, xoana hoka himaxaiminirita hihinaehare? Hiyaiya, wityotya atyoite Enore nahalakoa wiyane hoka hatyo atyoite wisomitere akereta mohena wiso. ¹¹Hiyaiya, exakere atyo Iraití Waiyexe nexa:

“Aliterexe niraeta”, nexa Xekohaseti. “Tyotyaita halitinae hakaoli kakoa meholokoahena nahalakoi hoka nehenahaite: ‘Aliterexe nika hiso Enore’, nexahaite”, nexa.

¹²Hatyo hiyeta wityotyaita hatya xakini wiyakaihena wawenane tahi Enore hiye.

Awa Atyo Iniyalahare Maniya Hihinaehare Hamoka

¹³Hatyo hiyeta nikareta kaisere wiraeharetya haiyanai. Hoka awa atyo xoalini hare xisoma hoka iniyalahare maniya xihinaeharenai xaxomokanikisa.

¹⁴Xekohaseti koamaniya notyaonitere hiyeta, nomani atyo maisa xoarehare manakairatyakahare aka. Hoka xala ana xamaniya atyo xoalini hare manakairatyakahare tyaonita hoka manakairatyakahare terota atyo tyaonita enomana. ¹⁵Hexamaikohalinikijitaiya hihinaehare, hikanakairiterehare hiyeta hoka maisa atyo hihinaehare hawaiyetyare. Awa atyo hikanakairiterehare hiyeta hihinaehare iniyalahare maniya haxomokanikisa. Hiyaiya, Cristo atyo waini enomana. ¹⁶Awa atyo xoalini hare xisoma hoka haiyanai iniyalahare iraeaha, xoalini hare waiyexe xaokitere tahi. Xiriharira hatyohare kakoa.

¹⁷Hiyaiya, Enore koamaniya nawenatyaka atyo maisa nakairati, erati xoaha xini. Xakore hoka waiyexe wenati, mehexasikohaliti, ihalahaliti atyo. Isekohaliti Waiyexe atyo hatyoharenae ijita. ¹⁸Hoka xala xamani atyo nikare tyaonita Cristo ana hoka aihalahalalinikijita atyo Enore, exahe halitinai atyo tyakekotene.

¹⁹Hatyo hiyeta nika kaisere wisahena xoalinihare amehexasikohalikijitere wiso, exahe kahinaetya wiso hoka haiyanai tyakekohatienai waiyatelikijiterehare ityakekoneha kakoa xema. ²⁰Hoka awa atyo nakairati hiyeta Enore hatene hemaisatya. Tyotyia nakairatinai atyo kakanakairatyakere taita, xakore hoka maisa atyo ehokoreta nakairatyaka xini etakehare hatyohare hiyeta hatya iniyalahare maniya axomokanikijiterehare. ²¹Waiye atyo eteti maniakene, exahe vinhoxa maerakene, exahe xoalini hare maomakene, maisa hihinaehare iniyalahare maniya haxomokanikijita maheta. ²²Hiso atyo hawaiyoreta hityakekone kakoa, exahe Enore hoka waiyoreta hityakekone kakoa. Waiye kaiserehare atyo xala xamani hatyakekone kakoa tyomita xoalini hare hoka. ²³Hoka hatya anaiya atyo maisa waiyekehalakere hoka mahaiya atyo nijita eteti. Maisaiya hatyakekone kakoa xoalini hare kanakairita hoka maisaiya Enore ana waiyeta. Xoare xamani atyo maisa hityakekone kakoa xini hisomita hoka hatyo atyo iniyalahare.

Haiyanai Waiye Xomokaka Tah

15 ¹Wiso wikinatere wityakekone kakoa wisaoniterenai atyoite wakahinaehena inira tyakekoterenai, hakolalaha kolatyaha maheta. Maisaiya atyo witahi taita wahekoita. ²Nika hoka waihalahalalinikisa wihinaehare waiye tyaona maheta, exahe ityakekoneha kekoare maheta. ³Hiyaiya, Cristo atyo maisa hatahi taita xini ahekotya. Iraitu Waiyexe atyo exakere nexa:

Xalijiniharexenai kirawanehenere hiso atyo exoa noheno, nexa. ⁴Tyotyaxairatyakehenere Iraitixai Waiyexexanekoa atyo aotyakisawisomaheta hokawimamaxaharenehare watyaha maheta Xekohasetixahita. Exahe wimamairanehare mokitere Iraitixairatyoare tyaonitere kakoa maheta. ⁵Kasani Enore, mehexaikohaliti, iyatelitixekasehare kahinaetyaxisohokawaiyexamokakakoa naokita, Jesus Cristohaiyanaewaiyemohenere akereta. ⁶Nikare itehokaxityotyaxaxawalitaxaexakeritya Wiyekohase Jesus Cristo Nexe Enore.

WaiyexexIraitixMajudeuneharenai Ana

⁷Hatyohiyetahaiyanaexaohena xomana, Enore kakoa ihalaharehamaheta, Cristo aohenere xiso akereta. ⁸Cristo atyo judeunaxwakanehare tyaona, Enore katyakekotyaka maheta, exahe hoka Enore toahiya irahenereharenae enahetakomaniyereharenaehihiye kaotyakamaheta. ⁹Exahe majudeuneharenaehokaxEnore aexakerityahamaheta enawaiyexehare hiyeta. Exakere atyo IraitixWaiyexenexa:

Hiyetaite hokanaexakerityahisomajudeuneharenaekoni, exahe noxaexakiliri kakoaite noxerahomana, nexa.

¹⁰Exakere nehitiya IraitixWaiyexe:

Xisomajudeuneharenae, maikaxihalalaharehena Enore haomanere aohenerekakoa, Israel hotyalinai kakoa.

¹¹Exakere tehitiyanexa:

Xisomajudeuneharenae, xityotyaxaexakerehena Xekohaseti. Xityotyaxisohalithotyalinaexaexakerehenene.

¹²Isaías tehitiyanexa:

Jessé jikolahare itetyoa. Kaotyakaite hokamajudeuneharenae Xekohase tyaonahokaxexahita atyoite atyahaharetyoahenaha.

¹³Maika Enore, axatyahanikijiterehare wisokalore aihalahalinikisa, amehexaikohalikisaxisoxityakekoterene hiyeta hokaxiyatyahane hekoare Isekohaliti Waiyexeniyatere hiyeta.

Paulo Xawaiyexehalakala

¹⁴Nohinaeharenai, noxahekoli hiyehokaxalikini alaxawaiyexehare, exahe xawaiyore xalini hare kakoa, exahe xawaiyore xaotyakisakakoitanaoka. ¹⁵Hokaxalikini exe baberanaxairatyanomamairanini kakoa, haiyaxakiti Iraitinaexotyaxematyamaheta Enore iyatelitixehenere nomani hiyeta.

¹⁶Iyateliti isanomani Jesus Cristo wakanehare notyaonahokamajudeuneharenaenakahinaetyamaheta. Sacerdote akereta atyotyaonita WaiyexexIraitixEnore niraene noxakaitere hiyeta. Nikare notyaonita, kasani majudeuneharenae, Enore aokahene haomana efetatyakaharenai akeretanaokita, Isekohaliti Waiyexehiyeta.

¹⁷Hatyohiyeta Jesus Cristo kakoa xaxawalitaxnotyaonitahokaxnahakitere Enore hatene hiyetaite naokowiharetyoahena. ¹⁸Hiyetaite hokaxniraehena Cristo

xoalini hare tyomitere nohiyeti tahi akiti taita, majudeuneharenae Enore tyakeko maheta. Hatyoharenai atyo kaomaka Iraitu hiyeta, wenati waiyexe hiyeta, ¹⁹exahe metaharexe nomaka hiyeta, exahe Enore Nisekohare niyaterere xoaha hiyeta. Nikare, Jerusalém nalita, exahe Ilíria nali kijiya, Waiyexe Iraitu noxakaita tyotyta Jesus Cristo tahi halitinai hiye. ²⁰Naiyateretyoa minita atyo noxakaini Iraitu Waiyexe kakoa haiyanaikoa Cristo tahi masemaneharenai hiye. Maisa noxakai maheta xini koxaka haiyanai xakaihenereharenai hiyeta maheta xini.

²¹Hiyaiya, exakere atyo Iraitu Waiyexe nexa:

Haiyanae Jesus Cristo tahi masemaneharenae ite waiyehenahene, exahe haiyanae masemanetereharenae etahi ana ite waiyekehalaka.

Paulo Xane Waiyeheta Roma Yerenae Aokowi

²²Kahaliki xakore notyua nowaiyeheta xiso naokowita hoka maisa aliyakere xaka. ²³Xakore hoka koxaka tyare atyo nohateni alikoanai namiyatya hoka toahiyita tyare nowaiyeheta naokowita xiso hoka ²⁴kalikini atyoite notyua nowaiyehetehena xiso. Kasani Espanha noxanihenere xowaka nowaiyeheta naokowita xiso, exahe kasani tehitiya xakahinaetya natyo naokita noxanini nali xeta kakoa, nowaiyehetehenere xiso najikinita.

²⁵Xakore hoka kalikini atyoite noxanihena Jerusalém xeta Enore kaxaikoneharenai nakahinaetya maheta. ²⁶Macedônia, Grécia nali xoaha Enore xema tyaoniterenae ahotyalikisaha xiyehaliti, kahinaetyaha aokowiha Jerusalém nali Enore kaxaikonehare hotyalinai maxiyeharehare tyaoniterenae maheta.

²⁷Hatyohaitaha nikare ahokotyaha, nikare terota atyo ehateneha judeunae kahinaetyaha maheta. Hiyaiya, judeunae atyo Enore koamaniya nawenatyaka kakoa kahinaetyaha majudeuneharenae. Hiyeta hoka majudeuneharenae ite kahinaehena judeunae haxiyehareha xoalini hare waiyexe kakoa.

²⁸Exe hateniti ite namiyatya, exahe exe ahohisakoahenahere xiyehaliti hotohare ite nisa namiyatya hoka hatyo najikinitaite noxani Espanha xeta hoka notonani heko nowaiyeheta xiso. ²⁹Nowaiyehenere xiso xowakaite waiyexe xoalini hare Cristo nalitare kaotyakehena xomana. Hatyoharenae waiyekehalakita nomani.

³⁰Naxa xiso, nohinaeharenae, Wiyekohase Jesus Cristo hiyeta, exahe Isekohaliti xawaiyetyati ijitere womana hiyeta. Maika xakahinaetya natyo xiraexala kakoa.

³¹Xiraexatya nomani hoka Judéia nali matyakekoneharenai tyaoniterenae maisa xoana mokita natyo, exahe Enore kaxaikoneharenae Jerusalém naliyerenai hoka nohateni kakoa ihalahareha. ³²Nikare ite, Enore xaokalita hoka nokaokihena xomana hoka nihilahare, exahe xaihalahalinikisaita natyo. ³³Maika Enore, mehaxaikohaliti ijitere womana, kaxaiko xityotyta naoka. Xoaha taita.

Haxakaisakeheta Aoka Hahinaeharenae Hiye

16 ¹Wihinaehalo Febe tahi nirae xihiyee. Cencreia nali Cristo xema tyaoniterenae kahinaetyasero tyaonita. ²Maika exe wihinaehalo waiye xamoka. Nikare atyo Enore koamaniya tyaoniterenae

hahinaeharenae mokita. Maika xisa enomana, xoarenai hiye xamani xakahinaetene aohena hoka. Hiyaiya, koxaka atyo kahare haliti kahinaetya, exahe natyo tehitiya hoka koxaka kahinaetya.

- ³ Maika xiyakaiheta natyo Priscila, Áquila xoaha hiye. Hatyonai atyo haxawalita hakaha nokakoi Jesus Cristo hatene hiye. ⁴ Hakahinaeraha natyo hiyeta komita kaxaisakaha. Hatyoharenai hiyeta nihalahare ekakoaha. Maiha natyo taita xini. Majudeuneharenae Cristo koamaniya tyaoniterenae hotyalinai tehitiya ihalahareha ekakoaha.
- ⁵ Maika xiyakaiheta tehitiya natyo Cristo koamaniya tyaoniterenae ehanakoha nali hohisakoiterenae hiye. Maika xiyakaiheta tehitiya natyo noxiyakawalihare nohinaehare Epêneto hiye. Hatyo hotohare atyo Cristo koamaniya hawenane moka Ásia koa nali.
- ⁶ Maika xiyakaiheta natyo Maria hiye. Hatyo atyo kalore haka xinekoni.
- ⁷ Maika xiyakaiheta natyo Andrônio, Júnias xoaha hiye. Hatyonai atyo nohinaeharenai judeunai atyo. Haxawalita kaberehotyakahá nokakoi. Cristo niraene kakoarenáe waiyaneharenai kaiserehare atyo tyaonaha. Nahitita atyo Cristo koamaniya tyaonaha.
- ⁸ Maika xiyakaiheta natyo noxiyakawali Ampliáto hiye. Xekohaseti koamaniya tyaonita hoka hatyo hiyeta nakakawatene.
- ⁹ Maika Cristo hatene hiye kahinaetitere wiso Urbano hiye xiyakaiheta natyo. Exahe tehitiya noxiyakawalihare nohinaehare Estáquis hiye hoka xiyakaiheta natyo.
- ¹⁰ Maika Apeles, Cristo koamaniya masakare tyaonitere hiye xiyakaiheta natyo. Aristóbulo exanityo, ityaninae harenae hiye hoka xiyakaiheta natyo.
- ¹¹ Maika nohinaehare kaiserehare judeu Herodião hiye xiyakaiheta natyo, exahe Narciso hotyali Cristo koamaniya tyaoniterenae hiye hoka xiyakaiheta natyo.
- ¹² Maika xiyakaiheta natyo Trifena, Trifosa, Xekohaseti ana hakiterenae hiye. Exahe tehitiya noxiyakawalihalo nohinaehalo Pérside hiye xiyakaiheta natyo. Hatyo tehitiya atyo kalore haka Xekohaseti ana.
- ¹³ Maika xiyakaiheta natyo Rufo hiye. Hatyo atyo kalore haka Xekohaseti ana. Exahe inityo hiye hoka xiyakaiheta natyo. Inityo waiye mokita natyo haisani akereta.
- ¹⁴ Maika xiyakaiheta natyo Asíncrito, Flegonte, Hermes, Pátrobas, Hermas, xoahanae hiye, exahe wihinaeharenae nali tyaoniterenae hiye hoka.
- ¹⁵ Maika xiyakaiheta natyo Filólogo, Júlia, Nereu, enahahalo xoaha hiye. Exahe tehitiya Olimpás, tyotya Enore kaxaikoneharenae nali tyaoniterenae hiye hoka xiyakaiheta natyo.
- ¹⁶ Maika xikatyawaxakakoahena hoka xasohitanakolisakakoa xiyawaiyetyakakoane hiyeta. Tyotya Cristo koamaniya tyaoniterenae tehitiya haxakaisakeheta aokaha xihye.

Maika Xirihare Xaotyakisatiyena Metalahare Kakoa
(2 Corint. 11.12-15; 1 Tim. 1.6-7; 4.1-3)

¹⁷Nohinaeharenai, maika xirihare haiyaharenai exaoretitereharenai wenati kakoa, exahe haiyanai tyakekone ahowitikijiterenai, exahe xikaxaotyakisakehenere hare mahokoanetitereharenai kakoa. Maika xakikisoaheta enonitaha. ¹⁸Hiyaiya, nikare tyaoniterenai atyo maisa Wiyekohase Jesus Cristo xema xini tyaonahitaha, haxahokolaha ximita atyo nikare tyaonahitaha. Exahe waiyore iraetaha hoka aihalahalinikisa haliti maotikonexe hoka maoseratyahitene.

Xaotyakisati Miyane

¹⁹Iraiti Waiyexe xema xikinatere xisaonitere atyo tyotyta halitinae ana waiyekehalakita. Hiyeta hoka nihalahareta xikakoa. Kasani xawaiyore waiyexe kakoa naokita, exahe hoka maisa xawaiyorexe iniyalahare kakoa naokare. ²⁰Enore mehaxaikohaliti ijitere womanaite haxeroreta xikiji katyahe moka Ahalakoahaliti hoka xatyahakahekoatene.

Maika Wiyekohase Jesus Cristo waiye moka xiso naoka.

²¹Timóteo, nokahinaetyase hateniti hiye, haxakaisakeheta aoka xihye. Lúcio, Jasão, exahe Sosípatro, judeunae tehitiya, haxakaisakehenahitaha aokaha xihye.

²²Natyó Tércio exe babera Paulo axikahenere naxairatya hoka maika xiyakaiheta natyo Cristo koamaniya tyaoniterenae hiye.

²³Gaio haxakaisakeheta aoka xihye. Ehanako atyo notyaonita, ehanako nali atyo Cristo koamaniya tyaoniterenae ahohisakoatyakakoita hoka haxakaisakeheta aokaha xihye. Ali wenakalatikoa olo kaxaikotere Erasto haxakaisakeheta aoka xihye, exahe wihinaehare Quarto tehitiya hoka haxakaisakeheta aoka. ²⁴Maika Wiyekohase Jesus Cristo waiye kaxaiko xiso naoka.

Iraexatyati Xaexakeretyati Miyane

²⁵Maika waexakerehena Enore. Hiyaiya, Waiyexe Iraiti noxakaihenere Jesus Cristo tahi hiyeta Enore aiyatelinikisa xiso, xityakekone hiyeta. Exahe toahiya Iraiti Waiyexe metahare tyaonitere kalikini kaotyakehenere xoaha hiyeta. ²⁶Kalikini exe Iraiti Waiyexe kaotyaka toahiya Iraiti xakaisaseharenae xairahenere hiyeta. Enore menanehaliti xaokalita atyo kasemaka exe Iraiti hoka tyotyta haliti hotyalinae semene hoka tyakekone maheta. ²⁷Kasani, Enore haterore, exahe waiyorexe kakoa kihalalaharetyaka mene naoka, Jesus Cristo hiyeta. Xoaha taita.